

東  
華  
續  
錄

東華續錄

同治二十三

臣王先謙敬編

臣張式恭恭校

六月丙子朔諭議政王軍機大臣等馮子材魁玉奏南岸近日軍情並擬規復丹陽一摺鎮江南路之賊於馬陵水湖頭博落村等處深溝高壘守備甚嚴馮子材等以雨花臺官軍已破賊壘江浦浦口九汊七里等洲要隘連日克復水陸諸軍正在得手而江北敗賊紛紛南竄半爲丹陽踞賊截畱廣屯米石意圖全力抗拒並於水陸要隘拆橋伐木以阻進兵之路見擬分撥總兵田宗揚等由馬陵一帶步步進逼以期規復丹陽所籌尙中窾要惟鎮城防兵數止萬人攻守兼籌頗形單薄刻下南北兩岸官軍連營進逼難保該逆不乘閒鋌走窺伺鎮防馮子材務當妥籌戰守飭令內

外各城暨雲臺寶蓋諸山營壘加意防範毋稍大意其田宗揚等軍進規丹陽尤當謀出萬全相機進取不可輕率貪功致有挫失北岸自二浦九洑洲收復後逆賊渡江之路已斷揚城防務漸可稍鬆著都興阿卽調派勁軍渡江而南交馮子材等妥爲調遣力圖進取以厚兵力而牽賊勢至二浦九洑等洲克復情形迄今尙未據曾國藩奏報前據都興阿等奏到當經寄諭該大臣迅將詳細情形及水陸進取機宜迅速馳奏此時諒已奏報在途其馮子材等規復丹陽進兵機宜並著該大臣妥籌指示策應調度以期互相犄角無誤戎機唐訓方前奏爲苗練所困情形甚爲危急連日總未得其奏報屢系殊深疊經諭令曾國藩設法撥兵馳援見在臨淮壽州蒙城等處該大臣曾否派兵前往救應如何布置及各該處見在情形如何著曾國藩迅速馳奏將此由六百里各諭

令知之○諭張亮基奏攻剿思南府苗教各匪立解

境肅清並克復普安安南縣城各摺片思南府屬東西兩河白號  
教匪勾結石阡府屬黃號並各寨苗匪竄擾思南府城分股攻撲  
印江縣地方經總兵劉義方等分投進剿疊將印江縣屬齊梁山  
等各賊營掃蕩進破饒家壩大小巖關遂解思郡城圍復將小寨  
聖老巢攻克斬獲甚多並將逆首李侍賢等三百八十餘名正法  
剿辦尙屬得手黔省下遊股匪屢剿屢撫屢降屢叛蔓延數載迄  
今未絕根株見在印江縣境雖已肅清而思南府屬大小聖大壩  
場等處餘孽未淨從前韓超田興恕辦理貴州軍務未能悉協機  
宜故軍務至今未見起色勞崇光張亮基初抵該省務須力圖振  
作於該省將士趙德昌楊巖寶劉義方等加意駕馭籠絡俾其知  
感知畏奮力殺賊以後各處接仗情形尤當飭令從實稟報不准

欺飾普安安南均經攻克惟該二縣踞匪見在逃往何處未據張亮基聲敘明晰著勞崇光張亮基確切查明具奏並飭令在事文武探賊所向盡力窮追悉數殄滅毋任復行嘯聚總兵楊巖寶等見由壩灘進取貞豐著勞崇光等飭令該總兵速行政攻克俟該州城收復後卽迅飭三路兵練合力進圖興義府城以期肅清上游力固邊防毋稍延誤將此由五百里各諭令知之○戶部議覆前侍郎薛煥疏請於直隸設立四鎮責成十八省督撫藩司通籌餉項詔如所議行○丁丑以上年 文宗顯皇帝 孝德顯皇后梓宮奉移 山陵免所過宛平縣地方同治元年地丁錢糧十分之五賞農民籽種銀兩○諭議政王軍機大臣等劉長佑奏全軍出境進圖元惡仍須兩省夾擊並江長貴到省各摺片東省降賊宋憬詩負隅自固萬無姑容之理劉長佑見與臬司王榕吉策勵諸

軍督同前進於臨清之尖莊館陶之馬頭及南館陶一帶河口擇地安營並札飭祝塏伊縣阿及冠縣令孫善述各帶兵勇鄉團聯絡進剿復令山東署臬司呼震總兵保德親督兵勇會合夾擊一面咨令蘇克金由阜城移營前進恆齡等馬隊由臨清東西兩路渡河包剿布置尙爲周妥惟東西兩路尙慮空虛劉長佑進剿之軍自易得手其乘虛遠竄轉爲流寇不可不慮丁寶楨一軍前已諭令閻敬銘飭赴東昌會同恆齡等軍併力剿辦著該撫迅卽飭令速往以厚兵力其恆齡蘇克金等軍並著僧格林沁迅飭前進會同夾擊劉長佑務當布置嚴密悉數殲除不可輕率從事致令乘隙竄逸又復回擾直境江長貴前在徽浙等處剿賊尙屬勇往著劉長佑飭令該署提督隨營剿賊並著隨時察看如能帶兵得力卽行奏聞本日據唐訓方奏臨軍戰守情形並訥木津桂錫楨

兩軍見已赴東等語皖北軍情緊要異常蒙城糧道不通孤危尤甚唐訓方前派訥木津桂錫楨會同潁州守英翰在高鑪集一帶梭巡擊賊見復撤回山東此時北路軍營旣不能添兵援皖豈得復將該處畱防兵勇撤回著僧格林沁卽行查明訥木津等兵勇因何撤回東省並飭令仍赴蒙城聽候唐訓方調遣毋稍延誤將此由六百里各諭令知之○唐訓方奏淮河南岸李家觜之賊不時上下游弋威脅各圩抽丁勒糧我軍僅一營扼於長淮衛未能進徧五月初十日該逆步賊數百甫經出壘副將劉明典率水師駛至南岸開礮擊之賊卽反走劉明典登岸跟追該逆回戈轉鬪提督張得勝派兵飛渡南岸與劉明典內外夾攻當者輒殪賊乃大敗遁去旬日之內該逆閉壘死守十三日天長捻黨陳大和張總導等股馬步七八千人回竄紅心池河一帶擾及定遠該縣文

武登陴固守十四日

臣

復派副都統克蒙額馳至定城該逆已遁

向西北劉府一帶十六日靈璧所屬苗圩突出馬步多人擾至王

莊燒殺搶擄南距臨淮僅六十里

臣

復派馬步各隊疾趨而北該

逆知大兵踵至紛紛遁回

臣

以逆蹤飄忽兵至則遁兵去復來必

思所以制之因就臨淮軍中抽出遊擊歐陽勝美一營南屯定遠

以防自南北竄之賊又抽遊擊李坤一營北屯王莊以防自北南

竄之賊其徘徊劉府一帶捻黨苗逆以重金誘之將次渡淮併入

懷遠城中欲圖分道滋擾是時臨淮黑窩諸軍絕糧數日士卒僅

覓野菜充飢其機甚危幸督

臣

曾國藩協餉萬金閩海關協餉二

萬兩不日均可到營

臣

趕備麥麪並懸立重賞飛檄前敵將領乘

各逆未濟擊之十九日該捻前股渡淮旋由懷遠城外踰渦分紮

黑窩小街後股仍紮南岸上洪地方議以副將李振基礮船移泊



南岸牽制李家觜之賊普承堯等督率水師相機前進而以張得勝所部直擣上洪遂於是夜水陸並發黎明張得勝直抵上洪一鼓而前賊眾驚潰我軍乘勢薄之擊斃及淹斃無算南岸後股之賊殲除淨盡普承堯督水師併力轟擊該逆殿划遁入渦河內口劉明典等殿船直抵城下正在鏖戰黑窯之賊突出欲襲北岸營壘普承堯等整軍以待賊不敢近繞由後湖而遁已飭張得勝等軍直逼黑窯賊壘紮營並飭普承堯抽撥四營前赴南岸分紮李家觜下洪迤東數里與黑窯官軍南北對峙俾淮南苗黨百數十圩不爲牽動東路當可無虞連日淮水大漲尤非戈船不能制勝曾國藩所調提督黃翼升淮揚水師如能速到懷遠不難得手壽南逆壘堅閉不出城中糧食垂盡運道不通不得不偏賊猛攻開城中一綫之路道員蔣凝學毛有銘於五月十一日各率所部進

至演武坪攻破濠外賊壘又以我軍欲破濠內各壘以通城路必  
自東舉峯始該道等復於十二日督飭各軍苦戰數時始將該壘  
攻破駢斬盈千我軍亦有損折見擬略爲休息卽行相機再攻其  
宿州之韓村踞逆仍復固守臣前飭佐領訥木津守備桂錫楨馬  
隊會同英翰兵練校巡高鑪龍山等處遇賊卽擊冀通宿亳赴蒙  
糧路而該佐領等已於初十日先後遽回東省英翰一人四路接  
應實屬兼顧不遑豫餉解到一萬兩臣已飭由宿州截畱三千兩  
護解蒙城暫濟軍食昨又准張之萬來咨續撥一萬兩復飭馬新  
貽儘數提至蒙城以維危局訊據獲賊供稱捻逆爲苗逆所誘欲  
令分踞淮河北岸不料官軍速攻皆不得逞見擬暫回老巢  
糾約醜黨再圖合圍蒙城等語查壽州糧路阻絕蒙城饑軍孤懸  
均形危急知州毛維翼苦守壽城兩月餘若能再守旬日成大吉

一軍當可趕到蒙城捻氛日熾防兵甚單訥木津等既已回東丁寶楨之軍臣雖分別咨行迄無音信見已畱商曾國藩調回總兵何紹彩四營以爲遊擊之師能否速來尙未可定非僧格林沁速派馬隊馳至亳南攻開渦河一路蒙邑恐難久持上諭皖省捻苗勾結陰狡異常其勢甚熾唐訓方兵單餉絀督率諸軍竭力戰守俾淮南苗黨百數十圩不爲逆苗牽動所辦尙屬穩妥見當淮水大漲水軍非得戈船不能制勝著曾國藩迅卽飭催黃翼升師船星駛赴淮與普承堯等軍速將懷遠一城力圖攻克逆勢自必就衰並著該督撫等分飭蔣凝學等軍乘勝再將壽南逆壘進攻英翰兵練將高鑑龍山之賊掃蕩以通壽蒙兩處糧道臨軍糧餉告竭曾國藩協餉萬金已到其閩海關協餉唐訓方迅卽催提以資散放成大吉一軍前據曾國藩奏聞業經催飭赴援壽州仍著

飛催前進以解壽圍蒙城擊退大股髮捻豫省續撥餉銀應亦提到佐領訥木津守備桂錫楨馬隊何以遽回東省該撫摺內聲敘未詳著詳悉奏聞丁寶楨之軍見已到東東省軍務正資分投勦辦援皖之師恐僧格林沁未必能再有派援至皖省髮逆已鬆而苗逆之患方熾唐訓方兵力不厚且餉需絀乏臨淮壽州蒙城等處一有疏虞大局卽難於收拾曾國藩責無旁貸一切調度機宜著隨時與唐訓方妥籌辦理唐訓方以臨淮之軍不敷分布擬調總兵何紹彩四營以爲遊擊之師此軍曾國藩前奏爲鮑超派守西河此時鮑超之軍已由二浦轉戰而前甯防見尙無事卽著曾國藩速飭該總兵迅率所部四營馳赴皖北歸唐訓方調遣如何紹彩之軍已回楚省卽著曾國藩飛咨官文等迅速飭令赴皖將此由六百里各諭令知之○諭李鴻章分撥江海關各款解直隸

浙江軍營○戊寅諭議政王軍機大臣等前因潘祖蔭丁壽昌先後奏請酌減江浙等處漕額當交戶部議奏嗣據曾國藩等奏請減蘇松太三屬漕額因特降諭旨宣示令曾國藩李鴻章分別查明折衷議減茲據戶部奏稱江蘇之蘇松常鎮太四府一州浙江之杭嘉湖三府盡遭蹂躪民不聊生見在蘇松太三屬已奉特恩准予量減常鎮漕額雖較輕於蘇松等屬而比之各省額數究形其重似應一律量加體恤其浙江杭嘉湖三府並請飭左宗棠確查稅則重輕分成酌減各等語漕糧爲天庾正供京師仰食東南相沿已久必須通籌熟計中外兼權若竟將蘇松太三屬額賦驟減十分之六而他屬不得均霑於倉儲既有關係於辦法亦欠均平著曾國藩李鴻章按照戶部酌減分數將蘇松常鎮太等屬漕糧各按上中下賦則一體分別議減以昭平允並將各該州縣等

田額若干分析開列奏聞請旨務令下恤民生而不至上虧國用  
方爲妥善至浙省疊遭兵燹小民流離失所殊堪軫念自應將該  
省漕糧量予減免以示公溥之仁著左宗棠通飭杭嘉湖三屬將  
實在應徵漕糧稅則詳細確查各按重輕分成量減奏明辦理原  
摺片均著鈔給閱看將此由五百里各諭令知之○庚辰曾國藩  
彭玉麟楊岳斌奏自巢含和三城相繼攻克旋破雨花臺等處石  
城石壘賊恐官軍攻城又以崑新旣克恐滬軍大舉圍蘇李秀城  
與諸僞王紛紛改圖議由江北回援近救金陵遠救蘇州於是天  
長六合來安等處之賊次第解圍南渡其分踞橋林小店者亦紛  
紛渡江蕭慶衍度江浦浦口各賊已無固志遣隊襲之行未中途  
浦口之賊先已棄城遁走江浦之賊獻書乞降鮑超劉連捷察知  
其詐引軍疾進蕭慶衍出烏江與各水營合師約戰李朝斌派撥

師船由大江衝下先駐浦口以扼忠酋餘黨之未渡江者臣玉麟自率三營臣岳斌自率四營同入內河師次江浦賊又聞風宵遁遂會合陸師將江浦浦口一併收復仍沿途追勦鈔過逃賊之前賊正竄併九洲洲上僞城之賊閉門不納舟師截江圍擊賊不得渡爭向蘆葦中駭竄不知叢葦密處水深丈許或數丈溝港縱橫人馬一蹴卽溺死者以數萬計餘賊困偪江邊旣爲新開河所隔不得仍回北岸又爲大江所阻不得徑渡南岸各水師登陸輪攻搜刃就戮者半墮江自沈者半二浦旣復遂進規九洲臣國荃乘夜至新江口與臣玉麟臣岳斌商定先取南岸數隘撤其藩籬當派丁泗濱等四營爲頭隊從下關進喻俊明等六營爲二隊從草鞵峽進彭楚漢等爲三隊聯絡策應十三日各營循南岸駛下將偪賊巢用礮轟擊猝不得近我軍縱火江上先焚賊艦數百

乘勢薄壘搶登遂克下關草鞵峽賊壘八座移師轉向中關該處  
水流甚急師船不能上駛回軍暫息分兵襲破燕子磯而還臣岳  
斌詢知江濱叢莽中尙有隄埂一道可達九洑洲賊濠之外商令  
陸軍劉連捷等隊由隄埂缺處覓水而進彭楚漢等從洲尾攻上  
張錦芳等由洲頭攻下喻俊明等及李朝斌所部各駕三板繞洲  
奮擊另飭丁泗濱等由南岸分領水師直趨中關十五日兩岸並  
進賊之在中關者自恃附城爲壘卒不稍動其盤踞九洑洲者下  
有賊划上有僞城又於東西南三路分伏悍隊伺閒出擊我軍猝  
難得手彭楚漢等奮勇進攻誓得此隘戰至日晡賊始少怠初更  
後移船潛近賊壘時西南風作眾軍以火箭攢射焚賊拖罟數隻  
風引火猛烈及洲邊卡房喻俊明李朝斌揮軍直上成發翔等在  
左彭楚漢等在右大呼登岸丁泗濱亦由中關駛至躍過城濠肉



薄齋登遂奪九洲洲僞城聚殲羣醜無一脫者北岸盡爲我有長江一律肅清從此圍攻金陵較易得手又奏濱江一帶自九洲洲攻克後畱蕭慶衍駐江浦浦口以固北岸之防派鮑超渡江進紮孝陵衛以合金陵之圍吳坤修王可陞等連破賊壘收復金寶圩蕪湖金柱關一帶已無賊蹤西河灣沚各防亦均穩固甯國守將劉松山赴涇與易開俊會勦灣灘大阮之賊僞襄王奉王等股偪犯涇城易開俊力戰卻之其青陽守將朱品隆屢攻石埭未克回軍仍駐青陽徽州嶺防近無戰事饒州景德鎮一帶疊獲勝仗李榕已抵湖口俟江忠義兵到卽與饒軍兩路並進臣當檄江忠義李榕席寶田等各率所部自石太漸進東壩埽蕩而前洪逆畱僞忠王不援蘇州共守金陵須倣照破九江安慶之法嚴防江路禁截賊糧數月以後當有因飢內訌之事沈葆楨奏襄逆劉官方率

黨分擾太湖潘村江村谷源石斛立功街等處前隊已及楊村將  
從青石灘偷渡繞出祁景段起聞信卽飭繼果營從清風橋出祥  
字營從金家塢出親督鼓湘營新衡營馳往青石灘南岸之臧家  
灣以備不虞祥字營馳抵谷源賊眾列陣抗拒我軍分三路偪之  
衝擊數次不動遂暗挑勇隊由山僻小徑截賊爲兩前後夾擊該  
逆奪路狂奔追殺二十餘里陣斬千餘名敗匪下竄流口復回竄  
龍潭中洲另股從石斛倉頭鈔我後路我軍先占山頭施放火器  
賊新敗膽怯陣勢遂亂擒斬數百名解散千餘名追殺二十餘里  
收隊王沐則自守清風橋老營而令營官王安敦等督帶所部向  
立功街分路鈔擊探知巨股分踞中冠方村塢遂由江村先偪中  
冠該逆憑卡固守大隊賊匪自山而下對岸賊亦擁至王萼直前  
搏戰王安敦潛由山後登高列隊以分其勢並撥兵由左路越嶺

策應鏖戰逾時轟斃賊匪千餘賊遁歸方村塢乘勝衝殺過河賊大驚潰斬馘百餘劉逆已遁出建境劉典見抵景鎮雖黃李古賴等逆蔓延鄱都湖彭然東路無虞可以專意西討劉典智勇足備諸將齊心努力必能得手至督臣所派鈞字營已由彭澤移援湖口彭澤賊尙蔓延鄱境之賊復分擾梘田街等處劉典席寶田等從景鎮趨之賊眾聞風逃遁見已進紮梘田街等處將從茅屋嶺繞出賊後夾攻陶家渡北岸賊壘俾該逆不敢久踞又奏韓進春一軍進紮小港後派隊環攻賊壘忽雞公山之賊從對面山岡馳至韓進春督軍迎勦賈勇競進賊之馬隊先遁我軍遂折而東合勦雞公山之賊轉戰逾時截殺無算賊遂大敗入巢韓鳳飛躍濠而進諸將從之焚其二壘韓鳳飛復中礮陣亡該逆遂乘勢擁出各營向前縱擊立殪騎賊數十名賊乃披靡盡遁入壘堵逆黃老

虎由都昌回顧老巢劉于潯會同舟師進剿適韓進春督軍渡河該逆遽擁撲出隔濠相持斃賊甚多賊猶抵拒不退韓進春潛伏數哨於小港北岸佯令收隊該逆越濠緊追將至河干伏兵四起縱橫掩殺賊陣大亂拌死奔竄水陸各營斃賊無算是日另股賊匪萬餘思由章田渡旁襲亦經劉于潯會同團勇夾攻殲其前鋒始行退竄又奏偽祐王李遠繼率黨四千餘人分紮青田鋪饒郡練勇由童子渡駛赴牛召山夜分登岸馳抵青田鋪焚其哨棚守棚之賊倉皇回走乘勢衝入逆館擒獲逆酋斬之羣匪驚潰登山而遁旋見兵少復行馳下希圖圍裹我軍併力衝殺立殲賊目十餘名賊乃敗竄追殺十餘里斃悍賊三四百名賊供所斬逆酋係偽祐王李逆是否確係李遠繼尙難懸斷容再查明具奏 上諭議政王軍機大臣等鮑超彭玉麟等水陸各軍由江浦浦口席卷

而前羣賊望風奔靡其勢頗壯曾國藩見派蕭慶衍畱駐二浦以固北岸之防鮑超渡江南岸進紮孝陵衛以合金陵之圍洪逆畱僞忠逆共圖死守勢成阱檻惟青陽之軍攻石埭縣城尙未卽下著曾國藩迅卽催提江忠義一軍速由湖口與饒軍並進將江境各賊悉力驅除卽各率所部由石太進取東壩合圖金陵必更易於得手金陵賊勢日蹙宜防困獸之鬪恐有拚死併力竄往江西之舉曾國藩左宗棠沈葆楨務當設法協力嚴密扼堵不可任令竄往江境壽州一城經曾國藩檄周寬世成大吉兩軍併力赴援當可無虞而蒙城被圍尤緊臨淮官軍兵力甚單唐訓方竭力撙柱前曾奏調何紹彩所部赴臨爲助見在蕪湖金柱關一帶百里已無賊蹤何紹彩之軍在裘家渡等處連破賊壘諒可抽調著卽迅遵前諭撥往淮南歸唐訓方調度蘇郡之賊空虛滬軍應可乘

開進圖江忠義李榕等軍將由石太以進東壩浙軍能否分兵會  
攻廣德以期聯絡著左宗棠李鴻章等相機進取輪船濟賊情殊  
可惡已飭總理衙門照會英法各國公使於金陵未克以前不得  
在該處城外停泊輪船齎糧於賊其長江上下師船如有暗中以  
糧售賊者尤應嚴行查禁務令斷絕二浦克復李世忠作何動靜  
曾國藩隨時奏聞北岸之防並著曾國藩隨時知會都興阿富明  
阿與蕭慶衍之軍妥籌堵禦日前馮子材等奏鎮防禦賊情形曾  
諭都興阿等酌由北岸濟師鎮城京口要地此時應與圍攻金陵  
之師及滬軍之進圖蘇郡者如何聯絡互相接應之處並著曾國  
藩等因時策畫指示其欲竄江西之賊偽襄王劉逆乘虛圖越昌  
江上游以犯蕪樂經祥果等營分路截剿上游穩固鄱都湖彭羣  
匪雖尙鴟張而此時信防安靜則東路無虞專事西路據沈葆楨

奏稱劉典智勇足備此軍由左宗棠派往一俟江忠義軍抵湖口  
卽著飭令會合掃蕩刻下陶家渡賊壘劉典擬從茅屋嶺繞擊之  
是否卽克著卽飭令與韓進春劉于濬等軍隨時策應饒郡練勇  
將青田鋪之賊以數百人乘夜雕剿出奇制勝甚屬可嘉其紳士  
練卒出力之應行獎勵者著沈葆楨查明保奏所斬逆酋諒係賊  
中頭目是否確係李遠繼仍卽查明奏聞將此由六百里各諭令  
知之○于江南陣亡副將邱桂芳等祭葬世職加等○以故衍聖  
公孔繁灝子祥珂襲爵○飭四川湖北籌運米石接濟漢南軍食  
○停陝西本年例貢○辛巳吳棠奏疊奉諭旨飭姚廣武由宿州  
進援蒙城力圖解圍查姚廣武與英翰合兵圍攻韓村苦戰累月  
尙未得手疊據姚廣武請援是以臣前由清淮抽撥副將艾憲銀  
隊伍五百名赴宿助剿見據姚廣武稟稱五月二十日官軍夜襲

距韓村四里之周家小莊賊圩乘匪無備立時攻克殺賊多名逆首周全率眾南竄經英翰帶隊夾擊周逆展轉遁入周小寨經該寨練總擒獲斬首來獻姚廣武會同英翰將周小寨收撫其餘賊寨一律焚毀二十一日官軍乘勝進攻韓村搶入賊之外圩悉將賊房焚毀並將外濠填平數處該匪退入內圩死拒官軍因日暮收隊旋探悉龍山捻逆李大箇子率眾北竄蕭楊打糧徐境喫緊見卽抽撥馬隊赴徐追剿等語查苗逆襲踞韓村勾結龍山捻匪蓄意北竄已非一日臣愚以爲見在情形必須力攻韓村肅清漕河南岸方斷苗逆竄路又須北顧徐境驅除竄捻不使偪脅民圩煽誘降眾方足以資進取目下徐宿情形萬分喫緊若分兵援蒙則兩路均形單薄若全軍赴援則不能北顧徐境且徐境練圩林立非有官兵策應勢將被偪從賊臣已飭姚廣武會同英翰督師



迅攻韓村並飭姚廣武抽撥馬隊馳赴蕭礪一帶追剿竄捻一面  
飭朱善張曉諭蕭礪豐沛各民圩竭力嚴守以待官軍俟捻股殲  
除韓村攻拔卽飭姚廣武會合皖軍進援蒙城斷不敢稍分畛域  
至遊擊龔文林礪船前已出湖赴皖臣見又添撥前防盱眙之遊  
擊黎占雄礪船十八隻發給口糧軍火卽日駛赴臨淮隨同唐訓  
方官軍力勦苗練報聞○癸未諭內閣前因升任順天府府尹給  
事中林壽圖奏慶端巔預廢弛倚知府劉翊宸等爲心腹納賄營  
私專務搜括各情當經諭令耆齡徐宗幹逐款訪查秉公參辦茲  
據耆齡徐宗幹奏遵查被參各員情節分別擬議等語此案除前  
任閩浙總督慶端荒樂廢弛前任福建巡撫瑞璜老病昏憤業經  
分別革職休致已革候補道劉翊宸知府胡斌被參各節提訊供  
情尙無捏飾覈案相符幕友陳耀庭引綫餽獻細訪亦無確據歸

另案擬結外已革建甯府知府張文斌抽收釐金並未侵那入已  
停撤以後尙無私抽情弊城工係紳董經手亦無浮冒開銷各處  
關塞均經嚴密防守督勸捐輸隨收隨報因各捐生未開履歷送  
府致未請獎其填給府印實收據稱因司收未到暫刊行用尙係  
實情已革候補知府張其曜前署崇安縣事經省局及知府札飭  
捐銀一萬一千八百餘兩已分別解省解府並無填少收多抑勒  
數萬情事其咸豐九年錢糧所徵不及六分在未奉膳黃之先亦  
非違例急徵團練經費歸紳士經理並未假手官吏辦團事竣卽  
行回省實未席卷先遁捐升知府係咸豐九年在任時奉派官捐  
得邀獎敘查覈案卷均屬相符張文斌張其曜前因洩漏軍情業  
經革職歸案審辦據張文斌供前爲翼長適染寒疾其時廖士彥  
函催撥餉當由幕友函復敘及慶端有酌裁廖勇之語張其曜供

彼時辦大營糧臺因總督諭裁廖勇而該革道疊函催餉因以此言答復別無交結欺蒙情事所供尙非捏飾張文斌張其曜均著開復革職處分惟於軍務重情函札未能審慎亦有不合仍著交部議處前代理崇安縣知縣劉振榮在任勸捐所捐銀兩有另加三成歸補聯局經費名目當時並未明白曉示以致各捐生紛紛上控難保無浮銷情弊著齡等已飭省局覈實查明給獎如查有隱混情事即將劉振榮從重參辦崇安縣知縣戴昌文於馮席珍帶勇到境並不妥爲安置以致勒捐索擾淫掠傷人雖查無導引勒索確據而因循不職坐視丁勇擾害閭閻實屬咎無可諉著革職永不敘用已革道員馮席珍縱勇騷擾實堪痛恨前經李鴻章奏參已有旨發往軍臺效力覈其情節不足蔽辜馮席珍著永不敘用仍從重改發新疆充當苦差候補縣丞秦倬勒捐生事著李

鴻章嚴行查拏解往福建審辦○諭前因耆齡徐宗幹奏遵查章琮等被參貪劣各款案據分明猶復恃符狡展當經降旨將道員劉翊宸等先行革職歸案訊辦並令將該員等侵吞捐項銀兩著落追賠茲據徐宗幹奏審明捐務舞弊各員按律擬結並將各員應繳銀兩已完數目開單呈覽一摺此案已革道員章琮及革員朱仁來埇等擅動公項顯係朋分私用業經革職並著永不敘用其應繳銀兩除完繳外餘欠仍著監追已革庫大使屠堃著俟提解到閩訊供究辦革書林玉堂等欠數尚多仍著嚴行追比四川成縣龍茂道鍾峻於福州府任內失察官錢局舞弊處分業經部議完結著免其重科知縣曹學偉請託局員李爾蒙抵報銷李爾復浮銷經費著一併革職永不敘用李爾業將賠款繳完著先行提禁曹學偉仍著監追已革同知胡斌夥同濫支稅銀業經革職

並著永不敘用仍押令賠繳銀兩已革道員劉翊宸秦金鑑應繳賠款已據依限清完均著開復革職處分仍交部議處已革知府陳謙恩雖無侵那情事而收支款項並不隨時清釐以致重利借貸經費益形支絀業經革職並著永不敘用其應交欠款仍著監追以上革職永不敘用各員其應行賠繳之項一俟清完卽行具奏其僅有賠項並無參款牽涉者著卽於賠項清完後遞解回籍不准在省逗遛至各局濫支稅釐正項及無著商欠前經分別著賠除裕鐸等均經全完外其餘均未清繳著將在省各官吏嚴行勒追離省之員分咨旗籍催繳其部飯火耗等款未完各官吏著交部分別覈議治罪○諭前因解任福建布政使裕鐸被參狎妓荒謔各款供證確鑿猶敢飾詞強辯曾經降旨將裕鐸等先行革職交耆齡徐宗幹提集全案人證嚴審定擬茲據徐宗幹奏訊明

裕鐸被參各款並知縣私提人犯教供分別定擬各等語裕鐸以  
監司大員飲譙劣紳姚鏡圖之家娼優雜處實屬不自檢束有玷  
官箴僅予革職不足蔽辜著革職永不敘用以儆官邪知縣王炳  
訊無確證著准其開復原官該員見在指捐山東知縣卽著勒令  
出省不准逗遛前署汀漳龍道汪茹鑑於姚鏡圖邀飲時並未前  
往著免其置議已革知州姚鏡圖驕盈傲慢不協鄉評雖訊無結  
納官長招搖射利實據究係荒謬業經革職仍著永不敘用前代  
理浦城縣知縣柯霖並非承審之員輒將案內要證妓女提問雖  
無幕友教供情事亦屬不合著交部議處○甲申諭議政王軍機  
大臣等袁甲三奏籌解蒙城米糧並籌東路防務請調東省馬隊  
招募馬勇各摺片前因蒙城見糧僅敷五日臨淮糧食垂盡諭令  
袁甲三在陳郡設法勸捐運赴臨淮蒙城兩處茲據袁甲三奏稱

陳郡麥收歉薄糧價騰踊見勸積糧禦賊已覺萬分爲難同時並辦勸捐尤覺無從措手且水道旣梗由旱路繞運蒙城亦須曠日持久見於亳州太和阜陽之高家等寨勸諭該練總高錫齡等籌送蒙城糧食千數百石許以如期運到從優請獎其力能捐輸者作爲捐辦或作爲墊辦再行籌款歸還等語所籌尙屬周妥卽著照所擬迅速辦理並著檄令該地方官迅飭該練總等速行運往期於必到以濟危急蒙城北路糧道尙有宿州一綫可通並著吳棠督飭徐州鎮道多籌糧米迅由徐宿接濟無論如何爲難總當設法速行運到至臨淮距陳郡千里惟有下游清淮水路就近可通並著吳棠速運糧米解往毋稍遲誤前因臨淮蒙城米糧垂盡諭令吳棠設法解運糧餉濟急迄今將及一月未據該漕督覆奏皖北情形危迫如此該漕督視同膜外毫不關心實屬玩泄著卽

懷遵諭旨趕緊籌辦不准稍事推延致誤大局歸陳等處團勇雖不能越境剿賊然在本境防堵總可聯絡聲勢藉資禦侮袁甲三務當與毛昶熙設法鼓勵各團勇齊心禦賊毋令闖入本境並曉諭各圩寨力圖自拔倒戈向賊以孤苗逆之勢張岡一帶捻匪卽著張之萬毛昶熙迅速攻克以便移軍進逼永亳以剿爲防將此由六百里各諭令知之○諭景綸等挑吉林黑龍江餘丁各一千名赴豫助剿○乙酉諭議政王軍機大臣等多隆阿奏軍情喫緊各路之兵勢難抽撥赴甘一摺據奏所統各軍僅萬餘人分爲兩路進兵且顧後路兵力已形單薄兼以屢次傷亡病故甚多見在各營疫氣更甚逆回時來搦戰每次迎剿派三成出隊竟不能齊幸各將士久經戰陣不至失機雷正綰防剿三原一帶恐回逆被剿西竄此時斷不可動等語諒係實在情形惟甘省軍情亦甚喫



緊熙麟駐紮慶陽兵力過爲單薄所調各兵惟延綏鎮兵甫到卽經失利其蒙古阿拉善旗官兵未曾入口被回匪設伏邀截致有挫衄甘省援兵他無可望多隆阿仍應於萬難之中妥籌兼顧所奏雷正綰曾飭前駐三原之馮元佐練勇三千人赴甘助剿著卽嚴催星速前行並著熙麟迅卽催提到甘後妥爲調遣以資得力渭河南岸穆圖善等馬步各軍已抵臨潼進剿沙窩等處回巢疊有斬擒著多隆阿卽飭相機進剿並飭北岸之趙旣發等營嚴密固守謹防賊匪乘閒撲擾毋稍疏虞一俟各營疫氣漸消沙窩等賊巢攻破南岸之兵合軍北岸進攻高陵卽可與雷正綰東西兩路合力爲聚殲羣醜之計多隆阿督辦陝省軍務責任綦重諒於進取機宜不至稍有遷延致孤委任該將軍病尙未愈各營將士酷暑辛勞患疫尤多著卽加意拊循並妥爲調攝以紓廛念南岸

之兵亦經攻克沙窩回巢省城即可無虞前經疊次諭令馬德昭一軍省防稍紓卽飭赴援甘省並著多隆阿等飭遵瑛棨尤不得以擁兵自衛藉詞牽制前諭多隆阿嚴參抗玩差務州縣此次復據奏河水衝動浮橋糧船亦因水漲不能上下改由陸運於沙淤中牽挽更爲艱難等情總由各地方官於軍前運濟過於疲玩以致營中幾至絕糧殊屬可惡著瑛棨嚴督各該地方痛加整飭妥籌運濟如再仍前疲玩該撫身任地方自問更當何罪回逆狡詐百出瑛棨前奏派令省城之阿渾出城議撫而城外則依然燒殺當卽諭令該撫不准輕率擅行議撫徒爲回逆所愚此次多隆阿奏復有接撫臣函稱建議招撫等語回逆等非痛深創鉅豈能帖耳歸誠瑛棨著仍謹遵前旨實力防範斷不准希圖苟且甚至央及奸回前往議撫墮賊詭計懷之慎之平涼固原賊勢如何熙麟

務就見有兵力妥爲防剿一面催提陝省援兵豫籌調度將此由六百里各諭令知之○丙戌允戶部奏酌提奉天旗倉穀米十萬石運京以供支放○丁亥駱秉章奏僞易王石達開兩次犯蜀皆爲重兵堵截退入滇境而詭謀未息以中旗賴積薪一股先自甯遠內竄以僞宰相李幅猷一股仍由黔境下趨而自率大隊由滇境之米糧壩踵渡金江意謂我軍已跟追中旗不暇回顧乘勢急進使我驟不及防臣揣度旣審當飭署雅州府知府蔡步鍾就近募勇調阜和營及木坪松林漢土各兵並重慶鎮唐友耕一軍馳防安慶壩至萬工汛大小兩路渡口札土千戶王應元扼守松林小河復調雲南提督胡中和所部分布化林坪瓦斯溝以爲聲援又檄護阜和協事都司謝國泰帶本標兵扼猛虎岡防其竄打箭鑪之路維時中旗殘匪遠遁陝境臣急調總兵蕭慶高何勝必兩

軍兼程馳赴雅郡以爲後勁而令邛部土司嶺承恩帶領夷兵將越嶲大路各隘紮斷偏賊使入夷地小徑卽從後路包鈔層層設守以臻周密三月二十五日唐友耕蔡步鍾等馳至河邊布置甫定后逆果擁眾三四萬人渡過金江知越嶲大路有漢夷各兵扼截遂由小路徑奔紫打地適松林小河及大渡河水斗漲數丈賊眾趕造船筏時至河邊窺渡疊被我兵轟斃多名四月初四日賊眾四五千擁至河邊拌命搶渡我軍排列河岸屹立不動連用槍礮轟擊將賊筏火藥引然同時炸烈搶渡之賊無一生還賊知大河難渡圖撲松林小河冀由瀘定橋直趨天全土千戶王應元扼河力戰前後斃賊數千都司慶吉等及土司嶺承恩復帶夷兵由後路鈔至新場一帶節節攻偏乘夜劫取馬鞍山賊營逆匪猝不及防夷兵從上壓下殺賊數百遂將馬鞍山據住絕賊糧道逐日

斃賊無算從此逆勢日蹙糧已漸竭石逆乃以箭縛書射投于戶王應元昭之以利欲使讓路王應元誓以死拒復以利誘土司嶺承恩欲使緩攻而嶺承恩攻之益急石逆自知陷於絕地憤極思逞十七日盡斬嚮導二百餘人傾巢而出分股一撲大河一撲松林小河唐友耕等隔岸轟擊兼以水勢湍急登筏者悉皆沈溺對岸之賊亦紛紛倒地該逆無計可施因伏賊巢殺馬而食繼以桑葉充飢二十三日賊匪二百餘徑至河岸自棄器械口稱投誠唐友耕蔡步鍾察知其詐督令開放槍礮石逆果親擁大眾由水路分撲船筏二十餘隻悉被擊沈時謝國泰已至松林遂與王應元督率土兵渡過松林小河參將楊應剛等亦同嶺承恩從馬鞍山壓下兩路齊撲紫打地將賊巢一律焚毀斃賊數千山徑險仄逃竄之賊自相擁擠漢夷兵練兩面夾擊槍礮如雨夷兵復登山嶺

競用木石滾擊賊眾墜巖落水者以萬餘計石逆僅率餘黨七八千人奔至老鴉漩復爲夷兵所阻輜重盡失進退無路其妻妾五人抱幼子投河其曾受僞職老賊自溺者亦復不少楊應剛等稔知該逆無路逃生於洗馬姑豎立投誠免死大旗石逆攜其一子及僞宰輔曾仕和僞中丞黃再忠僞恩丞相韋普城等並其餘黨至洗馬姑乞降楊應剛嶺承恩等將石達開五人羈畱在營遣散脅從四千餘人僞官悍賊悉予駢誅此股巨匪實已剿洗淨盡石達開等五犯於初十日押解到省當卽恭請王命將石達開極刑處死僞宰輔曾仕和黃再忠韋普城一併凌遲處死其子石碇忠見年五歲例應監禁俟及歲時照例辦理惟李幅猷一股見由正安敗遁婺川臣已知照田興恕約會劉嶽昭兩面合剿移調胡中和仍駐敘南並俟唐友耕所部凱旋卽令馳赴江津綦江以固邊

上諭內閣駱秉章奏生擒逆首石達開等並勦滅髮逆巨股一摺逆首僞易王石達開由廣西倡亂竄擾湖南湖北江西安徽占踞金陵復擁眾出犯浙江福建廣東等省邊境紛擾滇黔注意川疆志在必逞其攻城戕官荼毒生靈罪大惡極久爲覆載所不容此次川省將士人人用命將積年巨憝一鼓生擒並將全股髮逆殄滅實足以申天討而快人心太子少保四川總督駱秉章運籌決策調度有方深堪嘉尚著賞加太子太保銜尤爲出力之總兵唐友耕著記名遇有提督缺出請旨簡放其餘出力員弁兵勇著駱秉章查明請獎候旨施恩○諭議政王軍機大臣等石達開在粵逆起事首惡中最爲狡悍善戰此次銳意窺川其勢甚張其計甚狡駱秉章知該逆善於乘虛伺隙豫派兵勇沿河截剿用使積年巨憝一鼓殲除調度合宜實不愧爲封疆重臣石逆全股雖

滅而李幅猷一股尙在婺川難保不再作窺川之計且據石逆供稱李逆深知調度恐時日遲久則裹脅愈多又將不可收拾駱秉章惟當乘此聲威嚴飭劉嶽昭等速將此股殄滅至黔省苗教各匪處處與川界毗連滇省回眾情亦叵測仍須隨時設備駱秉章擬令胡中和仍駐敘南唐友耕一軍馳赴江津綦江以固邊隅布置尙屬周密卽著照所議辦理至張由庚等所部據瑛榮奏業經馳抵漢中惟漢郡羣盜如毛軍情萬緊張由庚等兵數尙單不足以制賊死命且山路崎嶇糧運不繼尤非行軍所宜此時川省軍務已漸就緒兵力當可分撥卽著駱秉章迅速添撥勁旅馳赴漢中以厚兵力並將張由庚軍餉設法源源接濟毋令缺乏該督素願大局想必能遵旨妥速辦理也將此由六百里諭令知之○李鴻章奏查自江陰界之顧山起至無錫城外止連亘數十里賊營



密布係僞漳王護王普王潮王侍王五逆帶領八九萬人希圖援應江陰竄常熟其江陰另股又於五月十四五等日圍撲楊庠經劉銘傳督軍痛勦大破賊鋒忠逆渡江回援已到無錫聲稱合五逆之眾水陸數十萬分路內犯李鶴章與黃翼升劉銘傳赴顧山一帶觀看賊勢縱橫六七十里賊於水陸兩路布置嚴密遂議分路滾營而進總兵劉銘傳進攻北涇爲左路滕嗣武等進攻麥市橋爲中路郭松林等進攻南涇爲右路復慮無錫援賊繞鈔王莊老營令周壽昌等由嚴家橋進攻張涇橋一帶賊營黃翼升等水陸分進李鶴章自率馬隊等營在顧山上下排列策應離蘇十八里之蠡口有賊甚眾黃翼升恐其由水道內犯飭令副將鄧長里等先將該處賊營二座攻破移堵羊尖湖橋各隘並檄副將張桂芳等赴謝家橋排列助勢二十一日出隊移紮右路南抵陳市

該逆已於街頭紮兩石卡阻我進兵並以礮船抵敵黃翼升焚其四船郭松林乘勢攻入擒斬百餘賊卽遁去遂傍前後大河分紮三營常州新到大股盤踞華市擾近楊厓副將耆貴等擊走之二十三日劉銘傳復於北涇河北岸紮駐兩營滕嗣武張樹聲等行近麥市橋該逆先搭浮橋渡河經周盛波等衝擊敗退河西斬溺無算我軍焚其渡船依岸屯紮各路濠壘均就一齊進攻左路劉銘傳轟倒北涇河邊石營五座賊於上流架橋渡河鈔襲趙宗道等擊敗之中路周盛波伏於河隄轟破木卡七處右路吳建瀛等繞近南涇營邊相持至午李鶴章遙見無錫援賊萬餘由張涇橋緱山羊尖各路鈔來恐周壽昌等兵力單薄飛調苗順親等帶隊往助而以馬隊洋槍向前衝突斃賊無數該逆遂退長涇水路之賊亦卽遁去各船向南涇衝進焚賊礮船十餘號賊以槍礮抵擊

水師不能登岸郭松林乘閒越過南澗徑趨長涇帶隊分攻東石營斃賊數百賊眾悉併街西參將張林錦繞攻街西頭營拔椿直上受傷陣亡郭松林等奮勇擁入石營斬首百餘賊始大敗街西十餘營之賊相率狂奔郭松林追至竹塘北澗逆眾分救長涇截我歸路適吳建瀛等趕至前後夾擊賊眾潰退是夜李鶴章黃翼升同赴陳市知會劉銘傳等往劫賊營火器齊發逆眾奔潰水陸官軍鼓譟而進劉銘傳攻破北澗賊營二十七座滕嗣武等攻破麥市橋賊營二十三座郭松林等攻破南澗賊營三十五座擒斬逆眾六七千名戰至天明江陰無錫援賊由跨塘橋長涇西陳家橋分路來援與敗賊合隊仍有十餘萬眾盡力迎拒李鶴章令各軍以小隊衝進以大隊圍裹之戰不數合賊即反奔左路劉銘傳追殺至八字尖右路郭松林賴榮光等分追至竹塘長壽滕嗣武

王東華等追殺至三巴橋沿途殺斃八九千名踏毀賊營賊十白  
餘座計兩日一夜生擒僞王宗僞朝將主將及義安福燕豫各逆  
首百餘名悍賊五千餘名殲斃萬餘焚毀賊船七十餘隻奪獲賊  
船三十餘隻顧山以西七八十里內一律肅清實足以寒賊膽前  
准曾國藩來函僞忠王李秀城由金陵回救蘇州昨據程學啟稟  
稱忠逆於二十二日糾集大股已入蘇城徧貼僞示聲稱分四路  
內竄幸其黨與大敗於江常之間其氣已挫 上諭見在江陰之  
顧山以西縱橫七八十里已無賊蹤當可乘此聲威先將江陰縣  
城克復並乘勝規取蘇常等城以期節節肅清僞忠逆已入蘇州  
徧貼僞示聲稱分四路內竄其言雖肆其氣實餒著李鴻章激勵  
各軍分道進逼毋任再行出擾摺內所稱生擒僞宗王僞朝將主  
將及義安福燕豫各逆首百餘名是否訊明正法其僞章王等五

逆是否在內恐各營稟報或有未盡確實之處該撫仍當確切查明據實具奏連日進攻情形並蘇常等處賊情並著隨時馳奏以慰廑系將此由六百里諭令知之○沈葆楨奏僞襄王劉逆敗遁出嶺後僞匡王賴逆復由建德南竄逼近鴉橋劉勝祥由鴉橋進兵遇於汪村賊以馬隊千人猛犯七次我軍不動營官鄒興發大呼陷陣裹創力戰各勇如牆而進礮傷賴逆落馬羣賊護之而逃賊乃大潰擒斬千餘王沐復賊之於曹家壩等處追至桃樹店而還浮梁以北賊氛稍靖鄱陽之賊於石門陶家渡增壘浚濠爲死守計席寶田營於袁家墩以偪之黃老虎親率賊黨撲營我軍合力堵禦斃賊三四百名賊始敗退劉典約會王德榜進剿崇光渡殺賊千餘將逆壘逆館埽盡該逆遁歸石門席寶田又將陳家嶺踞逆剿洗逐日於陶家渡挑戰該逆堅伏不出五月十九日各營

會攻陶家渡三面猛攻弁勇拔樁越濠肉薄以登賊勢將潰騎賊  
押之死守攻擊四時雖斃賊千計而堅壘急切難下我軍乃徐徐  
收隊是役也席寶田所統精毅營尤爲出力劉典所統克勇亦極  
銳戰黃老虎因鄱陽浮梁嚴緊未能南竄微甯糧缺又不願折回  
復喉羣逆堅守自赴都昌廣收大竹爲紮筏渡湖之計並有打造  
戰船圍攻潯郡之說彭澤勇軍亟須援應江忠義已由省拔營赴  
潯其應由彭澤或由都昌會攻俟到潯後察看情形進取 上諭  
逆匪竄踞鄱陽境內之石門陶家渡增壘浚濠爲死守計經劉典  
等進勦崇光渡以牽制石門陶家渡之賊席寶田督同饒防各營  
及江軍水師會攻陶家渡賊壘三面猛攻雖斃賊千計而堅壘急  
切難下傷亡勇丁頗多逆首黃老虎親赴都昌紮筏渡湖並據賊  
供有打造戰船圖攻潯郡之說經蔡声業督帶江軍水師擊退仍

未大加懲創而湖口彭澤乞援之書緒繹不絕是飭九各屬羣盜如毛江忠義一軍見已拔營赴潯著曾國藩速飭該提督由湖口都昌一帶轉戰而北會同劉典席寶田等軍廓清江境然後併力掃蕩皖南餘孽規取金陵方無後顧之患江忠義所部養精蓄銳不爲不久此次援剿上竄逆匪當倍加奮勉以副委任並著曾國藩傳諭該提督懍遵毋忽劉典王德榜業將崇光渡逆壘逆館掃盡著左宗棠仍飭該臬司等乘勝進取石門陶家渡等處賊壘毋任久踞沈葆楨仍當嚴飭平江韓字等營奮勇進攻毋稍鬆懈江南各軍分道進攻賊匪漸覺得手賊勢漸見窮蹙恐其蓄意竄往江西以圖牽制左宗棠沈葆楨務須督飭將士協力剿洗盡殲醜類俾賊匪無隙可乘規復金陵方有把握江忠義席寶田兩軍月需餉銀六萬兩經曾國藩飭兩江總糧臺提款支發惟該糧臺所

入儘數解皖猶苦不足勢難分潤客兵沈葆楨見飭善後局勉措  
江忠義軍營行費飭九江關道動撥洋稅三萬兩就近解營並請  
嗣後九江關所收洋稅先儘江席兩軍按月解濟卽著照該撫所  
請辦理惟皖營軍餉近頗短絀沈葆楨仍應妥籌兼顧均勻分撥  
所有留國藩前此奏撥九江關兌銀兩該撫移營嚴飭該道按月  
如數撥解毋誤要需此由六百里各諭令知之○以旗營領銀  
虧短諭戶部嚴定章程○予江蘇陣亡參將張林錦江西陣亡府  
經歷朱詠香祭葬世職○庚寅諭議政王軍機大臣等御史尋鑾  
煒奏太谷縣員杜氏毒命誣節一案司員桂迂衡竟謂員楊氏既  
非毒死卽是產死無疑憑空懸斷該員與沈長材同鄉同年並不  
早請迴避是其有意瞻徇已可概見聞蒸檢時件作云額後有傷  
骨節短少至今並未具結而該大臣等欲以非產非毒作爲持平



之論並聞究出贓銀一百十三萬餘兩乃僅以一萬兩入奏仍復含糊其詞恐愛仁等難免受人愚弄請嚴旨訓飭等語本日據愛仁奏賈杜氏一案果與該御史所奏情節略同是愛仁等審辦此案必尙有不實不盡之處是以物議沸騰難期翕服尋鑾煒籍隸山西自必確有聞見已降旨令該御史馳赴山西隨同愛仁秉公訊辦矣此案關係謀產誣節並地方官婪贓枉法重情既經該尙書等詳聞自應力爲平反乃仍含糊了結尙復成何事體著該尙書於尋鑾煒到晉後再將此案徹底根究務期水落石出以成信讞毋得受人欺蒙致負委任另片奏陝西路阻未能前往等語見在太谷一案既須另行審擬俟此案並胡廷華揭告董彙芳案辦結後再行請旨尋鑾煒原片著鈔給閱看將此由四百里諭令知之○諭英桂奏逃將宋憬詩叛迹昭著恐其西竄撥兵嚴扼要隘

一摺宋憬詩築圩增糧招集亡命叛迹昭著疊經諭令劉長佑督率大軍會合東省官兵相機剿辦英桂恐該逆徒黨眾多且晉省路徑爲該逆所熟悉一經被剿窮蹙勢將鋌而走險豫派兵勇在潞安遼州一帶擇要防守並派副將王巨孝等帶兵駐守平定州之固關先事豫防所籌均尙周妥卽著飭令在事員弁實力扼守隨時偵探毋得稍有疏虞另片奏蒲州府一帶黃河斗漲致濱河營盤半被衝失等語卽著飭令署總兵和昌等將營盤速爲修整軍械由局補發並確查兵勇漂沒若干照例辦理其沿河各州縣有無浸淹廬舍田禾並著飭屬查明分別妥辦其文報軍火經過永濟榮河二縣著飭令該縣等設法接遞毋致阻滯將此由四百里諭令知之○辛卯諭議政王軍機大臣等劉長佑奏進軍防剿疊挫賊鋒見飭嚴遏竄越一摺降賊宋憬詩叛迹昭著經劉長佑

咨會提督恆齡定期進剿並分派各營齊赴清水鎮探明恆齡進  
紮處所再行會合前進布置甚爲妥協乃各軍轉戰而前直逼甘  
管屯賊巢鄭魁士等令諸軍四面環攻該逆冒死抵拒官軍迄未  
得手撤隊時該匪分股繞出陣後兵勇猝爲所乘致有傷折賴姜  
國仲等由閒道助戰賊始敗竄而恆齡所部並未前來會剿據該  
提督聲稱是日卯刻出隊因沿途接捕是以未能會合等語行軍  
之要信賞必罰而尤貴持平不聽將令而輕進者雖有功亦必罰  
如劉長佑之參張植初等良足示懲惟恆齡馬隊雖據稱因沿途  
接剿未能會合而既經劉長佑咨會合剿卽應先期告知以便各  
營會合前進何以先期並無一語告知事後始行函致該督是恆  
齡期會不至不無貽誤劉長佑未將恆齡參劾辦理殊失其平該  
督有督辦三省剿匪事宜之責嗣後惟當督飭諸軍破除情面賞

功罰罪一秉至公俾軍務日有起色方爲不負委任恆齡如有不  
遵調遣之處卽著劉長佑嚴行參辦劉長佑如稍有瞻徇於各營  
員意存觀望者不能參處以致軍律不嚴惟劉長佑是問並著僧  
格林沁嚴飭恆齡恪遵劉旨 調遣鼓勇前進毋得稍形玩愒致  
干重究宋憬詩馬隊甚多宜防竄突劉長佑丁寶楨所部步隊居  
多此次分路會剿務在一鼓殲除蘇克金馬隊見駐阜城如馬隊  
尙不敷防卽著劉長佑飛咨僧格林沁調回以厚兵力丁寶楨  
見在堂邑與保德等各帶兵勇嚴防東南一面並著閻敬銘飭令  
該臬司等一切進止機宜悉聽劉長佑檄調以期併力進攻埽穴  
擒渠肅清疆圉至該匪被剿窮蹙勢必乘閒他竄仍著劉長佑飛  
飭祝壇春霖等督率沿河各員弁認真防範毋令竄越將此由六  
百里諭知僧格林沁劉長佑閻敬銘並傳諭丁寶楨知之○諭馮

子材等奏南路丹句等處屯賊日眾相機戰守一摺丹陽屯賊愈聚愈多近又由常州金壇等處逆巢先後併注分屯丹句一帶數約八九萬並紫丹陽七里廟左右添營紮卡拒守甚嚴揆度情形雖係爲援應金陵起見而賊情詭狡或窺伺鎮城或潛圖北犯均難豫料馮子材等見已飭揚防調往之副將刁經明兵勇二千九百餘名先行駐紮丹徒鎮聽候調遣相機進取並聽候曾國藩函覆辦理所辦甚妥當此兩岸軍威大振之時一切進剿機宜務須謀出萬全不可稍有疏虞其雲臺寶蓋等處賊壘尤應加意嚴守不可稍涉大意鎮防兵勇經此次揚防添派尙不滿萬是兵力仍形單薄前次奏派總兵田宗揚等由馬陵進徇丹陽仍著該提督等謀定後動戰守兼權斷不可爲賊匪所乘致有挫失是爲至要將此由六百里各諭令知之○諭恩麟奏平羅漢回近復挾嫌互

闕暨平涼被圍日久請飭催馬德昭迅速赴援及蒙兵遇賊接仗南路各屬剿匪並隆德縣及秦州一帶剿賊各情形隆德縣接壤平涼實爲東路要隘此次圍城之賊雖經李超羣擊退而賊眾兵單難保不再來窺伺南路秦州一帶雖經林之望訓練兵團連獲勝仗而伏羌縣漢回互鬪報復尋仇肆行焚殺必須趕緊撲滅俾免燎原卽著恩麟督飭靜甯隆德各屬員弁實力防範並飭林之望迅將伏羌初起回匪剋期剿辦毋令延蔓平涼被圍時逾兩月勢甚危急恩麟見派參將成桂統兵前往隆靜一帶設法解圍惟東路兵勇單薄萬難奏效馬德昭一軍前已有旨令其迅速赴甘卽著多隆阿飭令該署提督懷遵前旨剋日迅解平涼之圍不得稍有耽延致干咎戾雷正綰所派之馮元佐練勇三千人並著多隆阿飭令剋期起程前赴甘省毋許逗留援兵未到以前熙麟惟

當就見有兵力認真防守並添派官兵馳赴涇州分道進攻牽制賊勢毋令賊蹤麤聚平郡致有疏虞阿拉善兵行至平羅地方遇伏失利疊據奕梁等奏報情形大略相同此次恩麟僅據稟報粉飾之詞稱其先挫後勝實難憑信阿拉善兵既不得力其鄂爾多斯兵丁是否可用並著恩麟查明具奏平羅回眾復有互相仇殺之事可見從前辦理招撫敷衍了事終貽後患一切情形已據慶昫等陳明卽著恩麟恪遵前旨飭令甯夏鎮道稟商慶昫妥籌辦理該將軍惟當督率侯雲登等聯絡兵勇相機策應一面剴切曉諭解散夥黨儻有匪類狡執一以撓立卽督兵剿辦毋得再蹈從前覆轍馬化澧雖未滋事而軍械並未繳納其心實屬叵測恩麟因兵力不暇兼顧暫予羈縻是亦權宜之計卽著恩麟督飭所屬不動聲色嚴密防範毋得稍涉大意將此由六百里諭知多隆阿慶

昀熙麟並傳諭恩麟知之○諭前因總兵熊煥章帶兵援甘逗畱不進當經降旨革職並諭令駱秉章酌調勁旅二三千人籌給川資取道白馬關馳赴甘省以厚兵力本日據恩麟奏甘省軍務東路則平涼被圍兩月迄無援兵平羅漢回又相仇殺南路則伏羌縣屬漢回互鬪縣城戒嚴其秦階各屬徽縣則有陝西游匪之滋擾文縣則有川省髮逆之竄擾加以鳳翔大股回匪直撲兩當雖經兵民擊退而防範不能少鬆岌岌情形直有不可終日之勢若非鄰省大支勁旅前往援應不足以振軍威而殄狂寇駱秉章公忠體國素顧大局目睹邊疆重地糜爛至於此極想必能妥籌兼顧力拯阽危著卽懍遵前旨迅速調派勁旅二三千人派委得力大員統帶赴甘由秦州一帶徑赴東路進剿伏羌漸次進至固原相機攻取庶兵力日增軍務可有起色張由庚等抵漢中後兵數



尙單曾經諭令駱秉章增兵籌餉川省自石逆大股殄滅後大局已臻穩固是該省兵勇尙可分撥仍著該督懷遵前旨添調兵勇前赴漢南勦辦髮捻各逆彼處軍務得手則陝省大兵卽可抽調赴甘於邊陲全局實有裨益一切進止機宜並著該督妥爲調遣毋稍遲誤再李幅猷一股本日據毛鴻賓奏見在肆擾黔疆劉嶽昭等軍兵力是否足敷勦辦可以無須添兵協助並著該督酌量情形辦理將此由六百里諭令知之○諭毛鴻賓奏辰沅逸匪糾眾起事見調兵勇進勦並防勦黔匪各情形一摺匪首唐老九等由帽子坡潰敗後商同糾眾復仇屯紮於風車巷等處先後竄擾溆浦新化等縣境經知府邵綬名署副將玉寶等趕募勇丁督同各該縣分防要隘毛鴻賓飭令記名臬司趙煥聯總兵趙福元前往會剿並團總蕭兆芬等督勇迎擊頗有斬獲而邵陽司署被焚

土匪日集日多官軍半山營盤復被賊占踞距新化縣城僅二十餘里勢甚猖獗亟宜剋期殄滅以清疆圉毛鴻賓前已擢升兩廣總督計尙未交卸啟行著與惲世臨將進剿機宜會商妥辦一面飛飭趙福元彭炳武等督率各營齊赴寶慶郡城直趨隆回跟蹤追剿惲世臨身膺疆寄受恩深重尤當激勵諸軍迅將此股匪徒一鼓殲除以副委任至帽子坡餘匪與田興恕軍營革退及潰逃之勇倡立哥老會與黔匪互通消息而黔省荊竹園張家寨教匪勾結逆苗分攻邛瓦等處聲言下竄是邊其黎平逆匪擾及龍安高寨偏近通道復有另股圖竄靖通邊境包毛仙股匪圍攻松桃廳城雖經周洪印派撥田宗營馳往援剿立解城圍第該逆竄入鎮遠府屬之四十八溪與鳳永各廳相距不遠是湖南邊防在在喫緊見在皖北軍威大振髮逆全數渡江所有曾國藩札委黃元

齡募勇千人自可暫緩赴皖卽著毛鴻賓憚世臨飭赴辰州駐紮  
會同周洪印等接捕辰沅餘匪務絕根株並嚴防黔匪分竄毋稍  
鬆懈黔省羣盜如毛若不次第殄除則蔓延胡底所有黎平府屬  
逆匪及由松桃竄入鎮遠府屬等處之匪著勞崇光張亮基嚴飭  
各路帶兵員弁盡力兜剿勿得專恃鄰援石逆悍黨李幅猷見在  
率眾數萬出沒於黔西仁懷一帶分竄桐梓綏陽正安等處並著  
勞崇光等檄飭沈宏富等相機進剿就地殲除毋令竄擾楚邊貽  
患鄰境將此由六百里各諭令知之○諭張凱嵩奏貴縣逆匪勾  
結分擾官軍堵剿獲勝一摺貴縣黃逆糾合援賊四出竄擾經官  
軍分路擊敗復併爲大股圍攻馬村其橋墟蒲塘兩處各有賊匪  
屯聚勢成犄角見在登龍橋老巢之賊因外援隔絕其勢頗孤亟  
應乘勢進攻以除積年巨寇此時江忠義因江西待援甚急已諭

令統率所部星馳往援不能赴粵劉坤一勦辦貴縣等處各匪責  
無旁貸卽著督飭該藩司激勵派出之鄭金華戴盛寬等軍實力  
遏勦並令李士恩易元泰等移營進逼迅解馬村之圍一面規取  
橋墟務擒首逆至蒲塘賊匪旣係容縣逆黨分股出擾尤宜趕緊  
撲滅以孤范逆之勢蔣澤春業已抵潯卽著飭令取道下灣節節  
進剿並飭利輝等攻拔登龍橋老巢將首要各匪次第剪滅速收  
擒穴擒渠之效蔣澤春一軍俟攻破蒲塘後仍著取道鬱林進規  
容縣專圖范逆與廣東高州官軍聲勢聯絡以期盡殲醜類將此  
由五百里諭令知之○于湖南陣亡從九品鄒孔紳甘肅陣亡典  
史黃元慶廣西陣亡府經歷譚受益等祭葬世職○壬辰諭議政  
王軍機大臣等前因特普欽奏喀爾喀巴爾虎人等互爭界址該  
王旗不候三省咨文意存要挾景綸奏喀爾喀爭控地界巴爾虎

嗣認靡常各一摺當交議政王軍機大臣會同理藩院議奏茲據  
議政王等奏稱特普欽與景綸所奏各摺情詞互有不符又景綸  
前次勘斷界址摺件與此次摺內所稱各情節及兩次照繪雍正  
十二年地界陳圖方向亦多有自不相符之處並將應查各條陳  
明請飭景綸等會同查明速行勘辦覆奏等語喀爾喀與巴爾虎  
互爭莫端哈沙圖等兩卡倫地界事閱多年並未勘斷完結景綸  
與特普欽既各執一詞卽景綸前後所奏兩摺與所繪陳圖方向  
亦復自相矛盾案關外藩交涉事件豈容如此草率稽延著景綸  
特普欽特克慎迅速派委妥員馳赴西巴爾臺地方將莫端哈沙  
圖阿魯布拉克兩卡倫方向會同詳細履勘有無侵占那移確切  
查明限於數月內卽行斷結不准再事遲延該將軍等務當秉公  
辦理毋許授意委員豫存成見景綸係原行勘辦之員尤不得回

護前奏自干咎戾並著特普欽景綸特克慎將議政王等所指各條查明據實覆奏不准稍涉含混其黑龍江呼倫貝爾庫倫所有雍正十二年圖冊及景綸所稱莫端哈沙圖等二卡倫那移方向並擬改設標記處所均著特普欽特克慎速行照繪先行分送軍機處理藩院以備查覈至托克托呼圖魯遣人赴特普欽處遞文聲訴意欲聚集台吉等多人前往黑龍江實屬刁惡特克慎何以並不具奏著卽迅速派員馳赴該旗曉諭彈壓毋令藉端生事儻漫不經心任令托克托呼圖魯聚眾前赴齊齊哈爾向特普欽曉漬惟特克慎是問原摺著鈔給閱看將此各諭令知之○諭譚廷襄奏上南各廳險工疊出嚴飭搶辦平穩並蘭陽以下直東境內值被水處所請飭妥爲捍禦各摺片黃水由蘭陽下注直東境內值此盛漲地方被淹河南考城縣數年涸出之村莊復行被水山東

荷澤縣黃水已至護城隄下至直隸之開東長等邑山東之濮范壽等邑每遇黃水出槽必多漫溢而東明濮州范縣齊河利津等處水皆靠城行走尤爲可慮據譚廷襄奏稱此時河已北行不能再籌別策攔水惟恃民埝從未議及疏導恐數年後漸次淤墊或海口稍有阻滯事更爲難濮范一帶舊有金隄前在山東巡撫任內曾設法修築工竣復被衝缺四月間曾屬藩司貢瑱籌款未知曾否動工至利津爲入海之處水偏城根恐被蟄陷前在山東曾派員勘議督率紳士勸捐築壩尙未報竣等語伏前河流甚漲隄壩一切亟應設法修築著閩敬銘將如何集貲修葺之處督飭該地方官妥籌辦理濮范上游與直隸開州毗連之處亦有衝缺開州不修濮范築亦無益著劉長佑飭屬一律修築以資捍禦此外近河之處其應疏應堵處所旣未專設河員惟在沿河地方官督

率紳民妥爲籌辦民力不逮卽當官爲勸捐辦理劉長佑閻敬銘  
務當飭令各屬實心經理毋令河水漫溢貽患地方豫省河流漫  
及之處著張之萬設法捍禦一體嚴防至上南各廳險工仍著譚  
廷襄實力修守毋得稍有疏虞將此各諭令知之○癸巳吳棠奏  
苗逆襲破蒙城南李白二寨欲斷官軍糧道英翰一軍由韓村回  
紮小澗集以援蒙城並與姚廣武商畱兵勇分紮後路各寨以通  
蒙營餉道惟前竄蕭碭捻股經兵練擊退回巢見探李大箇子等  
股又有裝旗北竄之謠仍須北顧徐境姚廣武兵數甚單已飭添  
募勁勇八百名以備堵擊至臨淮軍情必須先拔懷遠方資控制  
且苗逆屯糧俱在下蔡水路運蒙必經懷遠懷遠一下則圍蒙城  
之賊糧道不通勢必反顧是攻懷卽爲救蒙之策苗逆在懷遠夾  
河築壘非水陸並進不足制勝臣前撥龔文林等礮船見已到防



爲數尙單仍須添撥礮船前往助剿此起水師向歸總兵黃開榜調度見在九洑洲已克高寶湖防稍鬆臣擬將在防水師酌派礮船百餘隻令黃開榜統帶駛赴臨淮會同唐訓方官軍力攻懷遠但將懷遠克復卽可乘勝埽除苗逆以靖淮甸再總兵黃國瑞連日偏攻白蓮池匪圩賊勢甚蹙五月二十九日夜間白蓮池內捻匪李帛等股約千餘人由西門出竄黃國瑞派隊追至沛北微山湖前股匪徒已渡湖遠竄未渡之匪悉數擒斬其渡湖南竄之捻經沛碭蕭宿練圩節節截殺斃賊三百餘名餘匪竄至龍山與前捻合股臣見飭姚廣武由韓村移師聯絡徐宿各圩剿辦捻逆一面嚴飭銅邳睢宿各州縣圩練隨時嚴防並趕將桃源成子河圩工修整酌派勇丁妥爲布置以扼捻逆東竄之路 上諭議政王軍機大臣等吳棠奏籌辦徐宿防剿及撥隊援皖所籌均尙合宜

著卽飭令黃開榜將此項駁船迅速修脩整齊卽行統帶駛赴臨淮會同皖省官軍水陸並進力攻懷遠以斷苗逆糧道而解蒙城之圍所有入皖水師口糧仍著吳棠照舊支發周化傳等投降恐不可靠仍著督飭艾憲銀等嚴加防範英翰回紮小洲集以援蒙城並與姚廣武商畱兵勇分紮後路各寨以通蒙營餉道卽著唐訓方飭令迅速辦理並將蒙邑情形隨時馳奏黃開榜水師入皖後唐訓方卽妥爲調度以資得力前竄蕭楊捻匪李大箇子等股又有裝旗北竄之信吳棠見飭姚廣武添募勁勇以備堵擊務須隨時偵緝實力嚴防其白蓮池竄出捻匪李帛等千餘人雖據黃國瑞報稱派隊追至微山湖將未渡匪黨痛殲並爲沛碭等各練圩節節剿殺而竄至龍山餘匪仍與渡過微山湖前股串合卽著吳棠飭令姚廣武由韓村移師聯絡徐宿各圩認真剿辦並飭銅

邳一帶圩練嚴防毋令乘閒肆竄本年河湖底水均大運中兩河堤埽及裏揚運河牐壩均有刷潰清河以下兩岸隄工亦多墊卸著吳棠將見在尤爲緊要各工廠督各廳妥實興辦動支款項節慎經理不得稍有浮糜並將淮揚長隄土工未辦段落查明應辦處所趕緊諭董集夫通力合作以資保衛毋稍疏虞將此由六百里各諭令知之○沈葆楨奏陶家渡踞逆自五月十九日被創後守禦益固黃老虎由都昌折回石門偵知我軍進攻陶家渡卽圖襲我營壘各統領會議畱克勇右營於梔田街劉典王德榜督六成隊赴茅屋嶺進攻陶家渡之北席寶田督四營分伏山下以待石門援賊而以四營攻陶家渡之東平江營攻其東南鄱陽民團繼之韓字營忠勇軍攻其西南江軍水師出小港內河水師出馬尾港饒州練勇護之二十四日谷軍壓賊而陣平江營首先衝入

焚其更樓燬木椿十數丈精毅營遂滅濠入壘搏殺數十人克勇  
拔取木椿三十餘層韓字營忠勇軍亦各偪壘該逆四面受敵負  
隅抵拒堅匿如故石門援賊偵我有備亦不敢前二十五日忽有  
騎賊數百帶隊數千至小港北岸韓進春督隊過河迎勦斃其前  
鋒數十賊遂驚遁我軍乘勢攻壘仍爲礮石所拒韓進春伏兵於  
左近山谷夜分於各山頭縱火疑賊四更後賊之大股已從山僻  
潛遁畱數千死黨踞壘牽綴我軍楚軍各營分路追勦截殺無算  
韓進春等衝入賊壘逆眾不支棄巢而遁焚燬賊壘三十餘座殲  
斃數千餘逆竄歸石門 上諭逆首黃老虎尙擁悍賊數萬由都  
昌折回石門勢燄尙熾沈葆楨務當督飭諸軍乘此聲威將石門  
股匪悉數殲除毋令與彭澤湖口諸賊合併致勦捕又形費手並  
著左宗棠飭令劉典迅速進勦將黃逆就地殲擒毋令再竄他處

一面督飭徽防各軍嚴扼要隘勿令此股折竄徽郡是爲至要劉于潯見在丁憂亦經賞假百日准其回籍治喪劉于潯回籍後萬立松暫行代理能否勝任仍著沈葆楨隨時察看將此由六百里各諭令知之○飭英桂迅解揚防軍餉○予江西陣亡副將喻可宗祭葬世職○甲午曾國藩奏欽奉諭旨垂詢壽州蒙城近日情形苗逆復叛後臣先後派蔣凝學毛有銘周寬世成大吉等援救壽州壽城三面環水僅南門一面可通又以賊寨林立與水際檝划相爲倚護四月二十八日之戰毀牛尾岡三壘五月十二日之戰毀東皋峯數壘二十六日猛攻城外賊壘未下而我軍三次苦戰已損精銳二千餘人之多據署知州毛維翼遣死士鳧水出城稱城中野草雜蔬摘食俱盡道殣相望勢不能支蔣凝學毛有銘以重金陷苗圩潛通米麥入城冀再堅持數日成大吉趕至必可

台解重圍不謂六月初二日運米者甫入而下蔡外委邱維城旋於初四日四更舉城獻賊毛維翼力戰死之臣以壽州既陷皖豫鄂三省震動乃檄蔣凝學暫駐三河尖辦足米糧移紮潁州以保要郡而衛豫境檄成大吉仍紮三河尖以蔽鄂疆檄周寬世退紮六安州以固皖省毛有銘暫駐六安爲諸路游擊之師亦因傷亡過多難遽進剿也苗沛霖既得壽州凶焰彌熾勢必窺伺臨淮臣見調何紹彩四營由甯國北渡馳赴臨淮歸唐訓方調遣前調之黃翼升淮揚師船須俟李朝斌抵滬後始得交替防務上駛入淮展轉需時尙恐緩不濟急又飛咨彭玉麟楊岳斌選派三板八十號星赴臨淮援剿苗逆待黃翼升到淮仍令各回本汛臨淮能否保全尙不可知其蒙城一路則更無救援鞭長莫及憂愧徒深查苗逆煽亂壽州被陷是皆臣治軍無狀調度多乖愧憤曷已署安

徽壽州知州毛維翼忍飢撫士扶疾登陴以練丁五百人苦守七十六日民皆效死弗去卒至食盡力竭城陷同殉亮節孤忠一時負絕惟有仰懇恩施准將毛維翼追贈道員照道員陣亡例從優議卹仍於原籍及死事處所建立專祠以彰忠藎其餘在城文武員弁俟查明另行辦理自李續宜丁憂回籍臣卽兼統其部下四軍去歲賊竄江北驟失三城臣調蕭慶衍毛有銘兩軍南援遂將防守壽州之三營移紮六安等處今歲苗逆旣叛又不能以全力撲滅苗黨仍畱蕭慶衍會剿巢縣調成大吉回援鄂省實有顧此失彼之虞應請旨將臣交部嚴加議處至各軍救援不力均有應得之咎布政使銜甘肅安肅道蔣凝學首先調撥初到壽城稟稱破苗解圍確有把握厥後一戰失利自悔輕敵貽誤匪淺應請旨革去布政使銜提督成大吉在湖北接到飛檄久不成行五月十

四日在麻城之宋埠拔隊遲至二十四日始抵固始又復逗遛數日竟未趕至壽州實屬遷延玩誤請旨將成大吉撤銷勇號以參將降調稍示懲儆仍各畱營帶隊以觀後效道員毛有銘同辦一事厥咎惟均該員克復東關後馳驅數百里赴援六壽瀕行之時其缺餉與成大吉等而拔隊不敢稍誤師期功過尙足相抵應請免其置議唐訓方奏臨軍疊戰南岸獲勝普承堯遂渡淮而南偏近李家背上洪賊壘六月初四日進攻李家背鼓勇直前斃賊無數該逆不敢戀戰棄壘潰逃賊之自上洪來援者亦經官軍擊敗劉明典等水師同時將李家背賊划擊沈多隻水陸均獲勝仗張得勝所部逼近黑窯賊壘聞普承堯已將李家背攻破乘賊眾驚惶之際派隊三路並進逆勢不支向西奔竄張得勝等直入壘中殲賊淨盡其潰逃之賊亦被朱淮森等截殺無數餘悉併入小街



林家圩閉守不出自是黑窯三壘悉爲我有張得勝等遂率所部直逼林家賊圩查林家賊圩雄踞渦淮之衝實與淮城相犄角欲克懷遠必自林家圩始欲克林家圩必自肅清淮河賊划專力渦河始臣已飭張得勝普承堯及水陸各軍暫爲休息仍卽相機進剿又奏壽州糧絕數月知州毛維翼死守待援詎成大吉一軍尙未到壽蔣凝學毛有銘等軍疊次猛攻圍仍未解六月初四日苗逆親於東北兩門多集礮划四面攻城以致失陷臣揣苗逆詭計必酌畱練卒礮划嚴守壽城而增黨懷遠繞出淮河南北兩軍之後以阻臨淮聲氣另抽精悍急圍蒙城固下蔡老寨之藩籬招宿亳泗靈之醜類何紹彩一軍畱守西河曾國藩昨已飭令北渡一時恐難趕到臨淮一軍東顧鳳陽西圖懷遠南防定遠北屯王莊面面兼顧兵力斷難再分白李兩圩被困六十餘日因飢降苗蒙

城遂成孤立該逆近抽隊紮營渦北以斷宿州赴蒙糧路英翰圍攻韓村尙未就緒而竄捻之在東省者復紛紛竄回蒙城一綫糧道立虞阻絕訥木津桂錫楨等管帶馬勇五百雖仍赴宿會同英翰協剿第值寇燄鴟張僅數百人亦難補救目前須得大枝勁旅速從亳州進剿或可拯此顛危 上諭議政王軍機大臣等壽州被困日久竟致失陷刻下苗逆之勢日熾計必畱兵嚴守壽城而增黨懷遠繞出淮河南北兩軍之後以阻臨淮聲氣添兵急攻蒙城期於必得固下蔡老巢之藩籬招宿亳等處之醜類占地愈廣收拾愈難曾國藩見檄將擬學暫駐三河尖辦足米糧移紮潁州以衛豫境成大吉仍紮三河尖以蔽鄂疆檄周寬世退紮六安州以固皖省毛有銘暫駐六安爲諸路遊擊之師並飛調何紹彩四營由甯國北渡馳赴臨淮歸唐訓方調遣又飛咨彭玉麟楊岳斌

選派舢板八十號星赴臨淮援剿均著照所擬辦理惟蒙城被圍甚急臨淮尤關緊要仍須援兵早到方可保全仍著該大臣妥籌兼顧俟各路布置稍定伺隙進剿苗逆毋稍疏忽昨諭吳棠飭黃開榜督帶礮船駛至臨淮會攻懷遠令英翰姚廣武兵勇分紮後路通蒙營餉道著仍遵前旨趕緊妥辦蒙城危急萬分欲援蒙城宜先攻懷遠以絕賊之餉道而林家圩雄據渦淮之衝又必須先行攻克方可進圖懷遠見在臨軍疊次獲捷聲勢尙壯著唐訓方卽飭張得勝普承堯等相機進取期於步步爲營共支危局臨淮軍餉匱竭著吳棠迅籌接濟不准遲延推諉致滋貽誤訥木津桂錫楨等馬勇前已到皖忽又折回疊經諭令僧格林沁催令仍赴宿營聽調著卽飛飭前進不准藉口耽延淄川一城計不日卽可得手苗逆勢饒日張亟望此股削平該大臣卽可移兵南下見在

圍攻情形如何並著僧格林沁具奏以慰馳系臨淮軍情岌岌楚  
北邊防較鬆除酌畱兵勇防捻外其前此防剿髮逆各軍著官文  
嚴樹森迅速調赴臨淮攻剿苗逆保衛長淮毋稍遲誤前諭曾國  
藩另籌一軍赴潁上擣苗逆老巢攻其所必救能否照辦未據覆  
奏長江見已肅清能否於江北陸路防軍內抽調勁旅或徑援蒙  
城或由定遠馳抵懷遠奮勇力攻以斷圍蒙之賊糧道卽著曾國  
藩趕緊籌畫一面調派一面奏聞壽州三面臨水一面依山非水  
陸大軍合剿難期攻克應如何籌策萬全之處著曾國藩與唐訓  
方會籌指示諸將機宜力圖攻拔壽州城內官員除毛維翼業經  
給卹外其餘文武下落著卽查明具奏唐訓方片內所稱白李兩  
圩被困日久因飢降苗等語李圩是否卽係李南華在內李南華  
素能打仗見在何處其人是否可用手下有無練眾曾否降苗並

著唐訓方查明具奏前據張之萬等奏張岡業已合圍頓兵日久何以尙未攻拔張之萬毛昶熙專辦張岡一寨師老兵疲久無功效自問當得何罪見在苗逆親入壽州如張岡早日得手可以分兵攻擣老寨則皖省軍務自可稍紓著卽嚴飭張曜等剋日攻拔如再玩延定將該撫等從重治罪懷之臨淮蒙城軍餉仍著設法繞道解濟顧全大局是爲至要陳防緊要著袁甲三督率袁保恆將兵團勤加操練以固豫境之防勿稍鬆懈將此由六百里加緊各諭令知之○曾國藩奏三月間僞忠王銳意犯鄂計不得逞折而東趨圖犯揚州裏下河厥後李鴻章之兵攻破崑山進逼蘇州曾國荃之兵攻破雨花臺各石壘而巢縣和含次第克復於是逆謀大亂紛紛南渡遠救蘇州近救金陵天六瓜州等處之賊不擊自退江浦橋林浦江之賊不攻自破在忠酋之意收回江北羣賊

全力保守江南僅畱精銳分守九洲七里洲等壘欲與金陵相犄角爲堅拒不拔之基不料我軍大舉進攻正值羣賊甫渡中洲未達南岸之際凡競渡之賊蟻聚於濠汊蘆葦中各礮船繞洲圍攻登岸搏戰數萬悍寇悉數聚殲縱偶有倖脫者亦不過逃歸金陵老巢寶未嘗紛竄江北致貽裏下河之患九洲洲克後臣卽檄鮑超南渡檄蕭慶衍防守二浦旋接楊岳斌曾國荃來函請調蕭慶衍同渡南岸紮駐神策門一帶而以鮑超一軍繞過鍾山直達孝陵衛漸圖合圍爲持重之謀者則以城垣太廣兵力猶單不宜力求合圍恐大股援賊齊至一隙可乘全局俱震爲制敵之謀者則以浙攻富陽滬攻蘇州金陵亦宜迅圖合圍使該逆備多力分不遑兼顧或者致力於金陵收效於蘇杭三處有一得手兩處可期並下臣亦以合圍制敵之說爲宜擬俟江西邊境蕩平再調江

忠義李榕席寶田等軍由皖南漸趨東壩會剿金陵咨請揚州鎮江防兵前來協剿此籌剿金陵老巢之大略也報聞○以苗沛霖攻陷壽州總督曾國藩巡撫唐訓方下部議處革道員蔣凝學布政使銜撤提督成大吉勇號以參將降補均仍畱營效力贈殉難知州毛維翼道銜予祭葬世職如道員例並於死事地方暨原籍建祠○乙未諭議政王軍機大臣等瑛棨奏紳眾聯名呈請暫畱馬德昭駐省並撫回之議勢將不成及甯羌州城克復進圖沔縣暨漢中糧餉匱竭賊勢日增各摺片東路回匪西竄直撲省垣雖經四關各營奮力迎擊而賊蹤未退多隆阿前敵各軍雖至臨潼之新豐鎮而道路梗塞仍與省城聲息不通見在西安城內糧運匱乏飢殍載塗情形萬分危急該紳士等呈請攀畱馬德昭一軍暫緩赴甘自係出於迫切真情著准其暫畱陝西省城力籌防剿

保衛根本重地以順輿情瑛榮身任封疆貽誤全陝大局實非嚴  
議所能蔽辜該撫惟當激發天良勉圖補救稍贖前愆此次所請  
嚴議之處著暫時毋庸置議多隆阿軍營疫氣曾否輕減該大臣  
病勢已否痊愈均深廑系此時回氛逼近省城勢頗猖獗該大臣  
惟當激勵諸軍迅將高陵渭南一帶回巢掃蕩期與省垣聲勢聯  
絡俾馬德品一軍得以迅速赴甘方不至顧此失彼蒲城被圍甚  
急該大臣何以尙未奏報著卽調派勁旅迅解城圍毋稍遲誤回  
匪乞撫本屬緩兵詭計瑛榮前遣阿渾等勸導已屬辦理乖謬此  
次又稱撫局難成是該撫意中專以主撫爲事必係奸回馬百齡  
等從中慫恿若不力思振作嚴密防範必致墮其奸計貽誤事機  
著穆騰阿瑛榮等督率兵勇將附近賊壘悉數掃蕩與多隆阿兩  
路夾攻庶軍務可期日有起色漢中賊勢日增官軍米糧缺乏瑛



榮當嚴飭所屬設法催徵採辦米石以資接濟甯羌州城業經收復著飭令知縣丁毓藻等督帶團勇乘此軍聲迅圖克復沔縣毋任久踞將此由六百里各諭令知之○諭駱秉章奏遵旨覆陳雲南情形並請畱劉蓉在川各摺片滇省地方糜爛道途寫遠非川黔等處廓清未易勦辦前經簡放賈洪詔爲雲南巡撫令先赴昭通東川駐紮相機辦理茲據該督奏稱賈洪詔已於二月自川起程回楚此時定已接奉前旨著駱秉章再行函催令其由川赴滇妥籌辦法至所奏劉蓉曉暢戎機不得不畱其在省李雲麟已督兵赴陝李桓不日亦可馳抵漢南督率旣已有人似無庸劉蓉前往等語見在李桓行抵湖北患病已賞假回籍調理李雲麟丁憂回旗穿孝前已諭令不拘假期趕緊赴陝恐一兩月內尙未必卽能抵營駱秉章前派張由庚等赴漢南援勦該道員等資望尙淺

恐不足以資統率劉蓉諸悉軍務如能暫赴漢南調度較可得力  
刻下川省軍務已平李幅猷一股聞已入黔境著仍遵前旨卽飭  
劉蓉督帶嚮導桂字等營並李雲麟所部親赴漢南督剿俟李雲  
麟到陝再行交替回川該督卽酌量調派不得稍分畛域如劉蓉  
一時實未能前往卽著駱秉章酌量保奏一員赴陝庶李雲麟未  
到以前一切得資統率正在寄諭間據瑛榮奏漢中賊勢日增糧  
餉匱乏情形危急而張由庚尙無出境之期漢中南北兩岸及褒  
河等處徧地皆賊見在欲解郡城之圍必須從東北之十里鋪分  
路進剿川中援秦之桂字嚮導兩軍共有五千之眾定當先掃南  
路以固川省藩籬然後北趨郡城等語張由庚派赴漢南爲日已  
久何以此時尚未出境著駱秉章嚴飭該員速赴漢南如任意逗  
畱卽行嚴參懲辦又據瑛榮奏藍逆由洋縣竄擾石泉等處距興

安府城甚近興安石泉漢陰一帶山徑叢雜又無重兵防守其勢斷不能支恐該逆一踞興安則陝南大局川楚邊防皆無日得以休息必須趁此三邊會剿方易剪除等語興安地方險要若被逆匪占踞於楚省邊防大有關礙辦理必致棘手疊經諭令官文等派令梁作楫一軍由興安併力進剿並將李桓所部勇丁暫歸該道員統帶兵力不爲不厚梁作楫見在曾否行抵興安著官文嚴樹森檄催迅進以保巖疆如興安有失定惟梁作楫是問浙江鹽運使朱孫詒日久尙未到任著官文駱秉章查明該員是否在川楚一帶卽行具奏將此由六百里各諭令知之○予陝西殉難知州金玉麟吏目馬鎮祭葬世職入祀昭忠祠○丙申晏端書奏修築省城礮臺請勸捐給獎允之○允兵部議改淮揚河標爲鎮標並頒行營制七條○丁酉嚴諭各省迅解定陵工程餉銀○以

近畿馬賊肆擾諭步軍統領等嚴定緝捕章程○以額勒和布爲

理藩院右侍郎

山內閣學士遷

○戊戌諭議政王軍機大臣等劉長佑奏

賊情狡悍官軍限於時地驟難得手一摺據稱逆賊宋憬詩詭詐

多端負隅自固深匿不出本月十三日提督恆齡督率馬隊侍衛

益謙總兵王佐臣等各率步隊先後齊赴李官莊駐紮十五日進

至黎兒莊距賊巢五里因該處高粱過密道路積水未消而先

期知會之山東臬司丁寶楨總兵保德及柳林團練均未見到恆

齡傳令暫行撤隊突有馬賊從高粱地衝出分路包鈔恆齡衝出

重圍海軍成保薩薩布各馬隊紛紛敗走傷亡兵丁多名步隊向

前抵禦賊始稍卻旋經大股馬步賊匪夾撲步隊亦不能支向北

潰退等語前次官軍進剿宋逆因恆齡期會不至致有挫失此次

黎兒莊接仗雖因積潦在途高粱蔽野以致未能得手而先期知

會之丁寶楨保德等均未趕到顯係號令不一呼應不靈似此一誤再誤豈不益張賊勢哉輔重地小醜跳梁官軍竟不能制尙復成何事體直東營務廢弛前降旨令劉長佑督辦三省剿匪事宜原期畛域不分藉資整頓該督膺茲重寄務當破除積習整飭戎行嗣後兩省在事文武員弁其有認真殺賊不避艱險者該督自應隨時奏請獎敘如有觀望不前藉詞推諉者卽著從嚴參辦毋得意存謙讓專事寬和致孤委任蘇克金一軍前經諭令僧格林沁劉長佑如恆齡兵力尙單卽飛速調往助剿今恆齡等兵既有挫失著僧格林沁檄飭蘇克金督帶所部馬隊迅赴臨清與恆齡合隊並飭令恪遵劉長佑調度此次副都統成保海羣如果策應不力卽著據實嚴參並嚴飭成保等奮勉立功力圖報效丁寶楨保德等業經劉長佑知會何以屆期不到著閣敬銘速飭丁寶楨

各營進紮柘林圍附近地方不准再有遲誤劉長佑俟各軍調齊  
布置完備卽著激勵諸軍滾營前進直逼賊巢盡殲醜類鄭魁士  
久懋戎行打仗勇敢近日體氣漸壯著准其畱營帶兵勦賊將此  
由六百里各諭令知之○諭張之萬毛昶熙奏豫軍在息縣獲勝  
並飭張曜各軍剋期攻拔張岡毫擒竄撲柘城復擾及會亭各摺  
皖捻由光固竄入息境圖援張岡張之萬等派軍進擊該逆敗竄  
回皖張岡外援已絕智窮力竭詭降思竄張曜嚴陣以待擒獲張  
源舞等正法又用間使其內訌仇殺著名擒首多名所辦均合機  
宜著卽督飭該總兵等乘此聲威一鼓攻拔盡殲醜類毋任竄逸  
毫餘出竄擾及陳州屬之柘城意圖西竄張之萬派令孫之友由  
商水太康向柘城迎頭截勦復抽調張士元一軍令由商水取道  
分進夾擊著卽飭令該參將等會督地方兵團實力擊勦不得再

令紛竄其袁安愚瓦店等寨仍飭總兵保英等緊攻勿輕許其乞撫致貽後患參將李世王一軍在會亭地方遇賊另股督軍擊退生擒悍賊李壑林等餘賊敗向西南與柘城合股復有賊騎奔竄太康邊境著卽咨會袁甲三派令兵團探蹤迎擊並令孫之友趕緊進兵李世玉等由後路偪剿以期節節埽蕩此股擒匪必係苗沛霖嗾使擾豫將以牽制我師豫軍無可分撥必致處處掣肘總須張岡克復方能操縱自如該撫等其振刷精神力圖此寨然後進兵歸陳埽除餘燼以副委任劉長佑所調之李明惠等軍如行至豫境著張之萬催令趕赴館陶軍營聽候該督調遣勿任延誤將此由六百里各諭令知之○飭廣東各省迅撥直隸軍餉○廣江西廣豐縣學額一名○庚子諭議政王軍機大臣等前據唐訓方曾國藩先後馳奏壽州失陷並曾國藩調度布置情形各摺片

嗣據張之萬等奏豫軍在息縣獲勝並擒竄柘城等處堵禦各摺片茲據袁甲三奏皖豫震動竭力籌辦一摺與曾國藩唐訓方及張之萬等所奏情形大略相同僧格林沁圍攻淄川尚未卽克勢難分兵南下節經諭令攻克後再行移兵赴皖亳州鹿邑股匪四出紛擾專恃陳郡團練堵禦袁甲三惟當督率練眾實力嚴防以杜竄擾張之萬毛昶熙見督豫軍規取張岡務宜懷遵疊次諭旨速行攻拔賊圩庶可移兵歸陳與袁甲三聲勢聯絡合力堵禦並著飭令孫之友李世玉兩軍迎頭探剿務將奔竄太康邊境擒匪痛加剿除力固邊境蒙城糧米久缺仍著袁甲三飭令高錫齡等將見辦糧米千石並遊擊呂浩然管解之餉銀一千兩星夜設法運往以後並著源源接濟毋稍遲緩練總王金奎此次絕苗不肯與通尙屬能知順逆著卽照袁甲三所請開復遊擊原官並花翎



勇號仍著袁甲三飭令王金奎迅速運糧赴蒙接濟潁州人心震動亟須添兵駐紮以固人心曾國藩前檄蔣凝學暫住三河尖辦足米糧移紮潁州著卽嚴飭迅速辦理並飛飭成大吉仍紮三河尖周寬世等仍駐紮六安州等處務期力保完區前調之何紹彩四營及彭玉麟等所部舢板八十號均著嚴飭星赴臨淮援剿以資得力並著隨時與豫軍聯絡聲勢互相援應毋得稍分畛域將此由六百里各諭令知之○壬寅僧格林沁國瑞閻敬銘奏潞川踞匪劉德培倚恃城堅糧足負隅抗拒疊經臣等圍攻逆情驚慌時思逃竄數次擁眾出撲均經我軍擊回六月二十日起更時該逆傾巢分路撲濠我軍各按分防地段迎擊惟一股由東南河口竄出馬步賊千餘名翻山逃遁侍衛托倫布等各帶馬隊數百名跟蹤追剿二十一日及賊於潞川東南五十里之田莊地方該逆

列仗抗拒我軍奮力衝壓逆勢不支我軍追殺十餘里殲賊四百餘名生擒百餘名訊明正法餘匪數百名翻山而逸我軍見復繞路截擊據獲賊供稱此股竄匪皆係會匪棍匪捻匪等語其存城賊匪於二十一日復擁眾出撲經我軍擊回二十二日該逆潛出東門知賊勢已分翼長全順等帶勇登梯攻城城賊益懼把總郭靖帶領投誠勇丁由西南首先登城都司周隆廷亦由西北攻進賊匪向東門奔逃我軍沿巷追殺斃賊多名竄出馬步悍賊千餘向正東逃去色爾固善等當卽帶隊尾追其餘受傷及老弱數百名均經殺淨盡立將城池克復至竄出賊匪我軍追殺三十餘里殲斃數百名逆首劉德培仍率黨數百人奔至大白山上經傅振邦色爾固善督帶馬步各隊四面兜圍我軍槍礮仰攻復斃賊多名該逆猶敢拋石抗拒傅振邦色爾固善揮軍直上勇氣百倍

將劉德培及其子劉申兒助惡匪首紀魁楊訓王在潮蘇宏圖馮中罄等暨夥匪六百餘名悉數擒獲未容一名漏網臣等當將劉德培等凌遲處死其夥匪六百餘名分交各營同時正法共計追殺擒斬賊匪二千餘名至白蓮池教匪經總兵黃國瑞疊次稟報進攻該匪老巢數獲勝仗屢有斬擒賊勢益蹙六月十七日黃國瑞督帶各營兵勇分東南北三路進攻總兵郭寶昌等帶隊行抵東門外圩該逆開槍抵禦郭寶昌等越入圩牆後隊繼進當將該處賊匪誅戮殆盡其時參將康錦文張從龍等亦將東南兩處寨門攻破斃賊多名合軍卽抵劉莊地方突出賊匪千餘名拚死抗拒將弁受傷不少仍裹創力戰當將劉莊廠裏新莊等處賊巢攻克該匪逃至白蓮池二山楊家峪棗園等處盤踞人數尙眾黃國瑞卽令前隊駐紮劉莊扼守東北兩面張從龍等扼守南門

黃國瑞親督各營進攻楊家峪老巢副都統舒通額等於十八九等日會合馬步各隊將白蓮池西寨門及棗園等處賊寨一律攻克卽分隊在西寨門內紮營匪眾見在鳳凰山鹿山小鳳凰山各山寨負隅固守臣等當飭各軍會合進攻山寨以期盡殲醜類

上諭議政王軍機大臣等淄川旣克匪首伏誅其逸出各匪諒已搜捕淨盡地方善後一切事宜及應行勦辦餘匪著閩敬銘暫住淄城妥爲經理各營勇隊分別遣留以節糜費該大臣於淄川克復後卽行拔營赴白蓮池駐紮先將教匪一股辦清再圖南下實屬奮勇可嘉所籌辦理次第均合機宜著卽督飭黃國瑞等分道進攻該處山徑險僻尤須屬令諸將慎之又慎不可貪功輕進以期漸次得手一律蕩平宋憬詩率黨背叛無難一鼓殲除惟因期會未至號令未齊以致恆齡等深入中伏幸未多有損失見在劉

長佑用滾營進紮之法芟刈高粱節節進逼並調集鄉團四面合圍僧格林沁復調派蘇克金駐紮臨清與恆齡馬隊會剿所有恆齡蘇克金兩軍著僧格林沁仍遵前旨飭令暫歸劉長佑節制調遣以歸畫一而免貽誤劉長佑當激勵諸軍剋期進剿擒渠掃穴剪除直東股匪以便僧格林沁攻克鳳凰山等處教匪後即可督兵南下不至再有牽掣至蒙城情形危急萬分白蓮池兵力足敷分布該大臣務須酌派得力大員分帶勁旅迅速往援傳振邦在徐宿一帶帶有年於該處情形定必熟悉或卽先行酌量調派以慰該地方官民倒懸之望李大箇子投誠情形及淄川逃出零匪共有若干著僧格林沁閻敬銘隨時分別具奏將此由六百里各諭令知之○署山東巡撫閻敬銘奏報黃水斗漲漫溢出口得旨前據譚廷襄奏黃水由蘭陽下注險工疊出當經寄諭該署河督實

力修守並諭令閻敬銘等將隄壩要工督飭沿河州縣設法修築以資捍衛著懷遵前次寄諭妥速籌辦並將被災黎民妥籌安撫毋令失所○四川總督駱秉章奏軍務未平請將鹽茶報銷展限辦理並鹽引積滯過多擬分別新舊犍富兩廠自同治元年始榮廠自同治二年始劃爲新引以前所積爲舊引新引仍行本岸舊引則犍富兩廠予限八年榮廠予限六年責成犍富榮各商與楚商合力行銷以顧課羨至湖北長樂等縣續增犍廠引張請仍招商領配以專責成下部議行○甲辰以孟秋時享 太廟 上前期親詣行禮○諭內閣僧格林沁督軍豫皖以來疊掃擒逆巨股殲除逆首張落刑等屢奏戰功嗣復回師北路圍攻淄川踞匪克拔堅城擒誅首惡洵屬勲勞懋著因念近日天氣炎蒸該大臣冒暑督師運籌決勝允宜優加賞賚以獎勤勞著發去黃綬珊瑚豆

大荷包一對黃瓣珊瑚豆小荷包兩箇翠玉翎管一枝白玉搬指一箇白玉煙壺一箇玉柄小刀一把火鏹一把俟伯彥訥謨祜由隆福寺差竣回京卽令親齋前往軍營交僧格林沁祇領並傳諭該大臣爲國賢勞尤宜善自保愛以隆委寄○諭毛鴻賓奏殄滅寶慶大股土匪擒獲逆首一摺湖南寶慶土匪自進踞半山後竄至洋溪窺伺新化縣城適記名臬司趙煥聯由益陽派赴寶慶之軍馳抵該縣總兵王永章趙福元先後趕至郡城該逆仍退回半山旋繞竄橫陽山王永章等分路截擊疊有斬獲圍燒大股賊匪於鄒家村焚斃殆盡逆首僞宜王唐洪山率黨紛竄黃皮嶺雙江口一帶經參將王政坤等跟蹤追剿至星子坪立將唐洪山擒獲餘賊竄逸大股殄滅殆盡仍著嚴飭在事將弁分道接捕務期盡絕根株毋畱餘孽所有在事出力文武各官紳准其由懋世臨策

案擇尤保奏以示鼓勵毋許冒濫○左宗棠奏浙師援江疊獲勝  
仗已將陶家渡賊壘攻拔該逆疊經痛擊敗遁洋塘石門劉典立  
派七營會同江軍追剿沿途殲斃多名行抵洋塘該逆列隊抗拒  
又經我軍擊敗後路石門雞公包之賊大至劉典復派黃少春所  
部先剿雞公包之賊該逆已向青山橋一帶逃竄各營分路進攻  
石門直逼賊壘賊眾棄壘逃遁乘勝掩殺該逆合併鐵鎗岡援賊  
復圖回拒適王德榜等由左路接剿而上攔頭截擊賊遂大敗越  
嶺逃竄追殺一千有餘直抵鐵鎗岡賊悉向彭澤縣境竄去浮梁  
鄱陽境內一律肅清都昌之賊亦聞風下竄見在李榕駐紮湖口  
江忠義已入江西將由都昌以趨湖口如機勢湊拍江軍躡其後  
江忠義李榕兩軍阻其前或可聚而殲旃惟由彭澤縣境可橫竄  
建德以出祁門劉典一軍尙須防宣歙一路未可復進且士卒勞



瘁異常擬令稍爲休息確審賊蹤以定進止見時天氣酷熱疫氣盛行實難趨戰俟秋涼後卽行督飭各軍力圖進取以赴戎機上諭議政王軍機大臣等刻下李榕一軍駐紮湖口江忠義諒已自潯拔隊由都昌直趨湖口卽可與江省追躡之師前後夾擊以圖聚殲著曾國藩左宗棠沈葆楨分飭各軍合力掃蕩無任旁竄李榕此次督軍入江前於彭澤境內得獲勝仗見已將該員補授浙江鹽運使並著曾國藩傳知該員令其努力功名以圖報稱見在闖入江西之賊本由建德祁門一帶竄出此時被剿窮蹙恐復由原路鋌走左宗棠擬令劉典一軍防堵宣歙一路藉資休息俟確探賊蹤趨向再定進止甚合機宜卽著左宗棠妥籌調度相機辦理至軍營疫氣盛行蔣益澧劉典魏喻義及水師各營染患甚多每營勉能出隊者不過三四成覽奏殊深廕系見在已交秋令

時疫諒可稍減左宗棠惟當加意拊循以消沴戾一俟疫氣稍除  
卽行相機進取已革道員楊坊以市僧依附洋商擁貲百萬此時  
浙省奇荒經左宗棠派令捐賑米五萬石竟敢抗違不遵僅認捐  
銀一萬兩並請將籌備京米銀一萬兩歸併浙捐實屬嗜利昧良  
居心狡詐著李鴻章將該革員派捐京米十萬石勒限如數追繳  
一俟繳清卽行押解赴浙交左宗棠卽照所請勒令捐輸賑米毋  
任狡展再本日已降旨郭嵩燾以三品頂戴署理廣東巡撫該省  
軍務吏治亟須整飭毛鴻賓本日奏到尙無起程日期晏端書黃  
贊湯均係五日京兆之員辦理深恐貽誤著郭嵩燾迅速前赴署  
任妥爲整頓以副委任如郭嵩燾已赴江北並著曾國藩李鴻章  
飛速行知令其迅速由江赴粵毋稍延緩將此由六百里各諭令  
知之○諭前據多隆阿奏李雲麟心浮膽怯言大而夸實非將將

之才諭令官文嚴樹森駱秉章查明覆奏茲據官文嚴樹森奏稱  
覆加考察李雲麟廉隅耐苦頗能得士卒心惟其年輕氣盛議論  
煩多才具雖稱倜儻性情不免麤疏若置之偏裨得知兵將帥薰  
陶磨鍊以老其才未必非他日干城之選此時閱歷尙淺猝投艱  
鉅恐致貽誤事機惟劉蓉則謀勇兼優戰功卓著其威望足資各  
軍統率且由川抵漢道路較近等語見在陝南羣盜如毛軍事日  
棘毛震壽一籌莫展因循貽誤李雲麟既不能獨當一面亟須知  
兵大員前往接替軍事方能日有起色著駱秉章仍遵前旨卽飭  
該藩司督帶嚮導桂宇等營趕緊起程前往督辦陝南軍務該處  
統率無人賊勢日肆狃猾駱秉章素顧大局務令該藩司星速馳  
赴毋稍稽延劉蓉並著專摺奏事一俟行抵漢南卽行迅速馳奏  
將此由六百里諭駱秉章並傳諭劉蓉知之○諭毛鴻賓奏訪問

粵東情形及籌辦赴粵事宜並據實舉劾各員等摺片覽毛鴻賓  
所奏粵東軍務吏治及捐釐籌餉各種弊端及見在前往應行次  
第整頓各情均能切實洞悉原委足見該督平時於鄰省利弊尙  
知詳細訪求故能言之親切粵省見在情形亟須得人而理毛鴻  
賓身任兼圻委寄滋重所陳粵事入手以大振軍威爲第一要著  
必得由湘募練勁勇攜帶同行方能確有把握著卽照所擬迅速  
辦理務須剋日成行到粵後一一克踐所言使地方軍務速爲振  
起吏治肅清捐務釐務均能整理於籌餉大有裨益方爲不負委  
任其張運蘭一員著卽准其帶往其所部老湘營能否調令由江  
入粵卽著毛鴻賓函咨曾國藩酌量辦理金國琛一員見當豫省  
軍務喫緊將才缺乏之際著仍遵前旨飭令迅速前往河南歸張  
之萬調遣以資得力黃冕亦著准其畱於廣東差遣委用所請以

三品京堂候補之處著毋庸議胡大任一員卽著毛鴻賓咨行官  
文等飭令赴粵幫辦鹽務中書郭崑燾前經劉長佑奏調赴直卽  
著毛鴻賓飭令迅卽前赴劉長佑軍營俾資臂指郭崑燾簡署廣  
東巡撫毛鴻賓抵粵後諒能與該署撫一切和衷商同辦理以收  
成效惟其到任究尙需時毛鴻賓務卽迅將赴粵應辦各事宜趕  
緊料理何日起程迅速馳奏毋庸拘定一月之期庶早一日抵粵  
於粵事早得一日整理也將此由六百里各諭令知之○命黃贊  
湯來京以郭崑燾署廣東巡撫由兩淮鹽運使署○命文格來京以吳昌  
壽爲廣東布政使李瀚章爲廣東按察使由督糧道署○是月蠲免福  
建順昌等二十一縣暨邵軍汀軍二同知仁壽等五縣丞所屬被  
擾上年額賦江西義甯等二十八州縣暨九江府同知所屬被水  
被擾舊欠額賦雜課